

萬有文庫

第二集七百種

王雲五主編

劉賓客文集

附補遺

(中)

劉禹錫著

商務印書館發行

劉賓客文集

附補遺

(中)

劉禹錫著

國學基本叢書

劉賓客文集卷十一

表章爲淮南杜相公佑修

讓同平章事表

臣某言。高品吳千金。至奉制加臣銀青光祿大夫。同中書門下平章事。兼徐泗濠等州節度觀察處置等使。餘如故者。初受恩榮。若登霄漢。退思塵忝。如履春冰。臣誠惶誠恐。頓首頓首。臣聞以德詔官。以勞定賞。苟或虛授。人無勸心。臣自守方隅。累更時歲。荷唐虞宣力之寄。乏齊魯報政之能。愧無可稱。以答高位。豈意聖慈宏獎。天澤薦加。以燮贊之崇名。被庸虛之陋質。懼速官謗。有玷大猷。伏以宰相之職。安危是注。其在當否。繫於慘舒。惟以材陞。例無平進。舉不失德。則副蒼生之心。苟非其人。或致外夷之哂。臣雖愚昧。嘗覽前言。豈敢冒榮。遂安竊位。輒思事理。冀盡芻蕘。若以汴河要津。漕運所切。徐方俶擾。師旅未甯。謹當上稟叡謀。下貞戎律。克期而進。屈指可平。勵衆之先。是臣之志。旣行其事。必在正名。所加節制。安敢飾讓。至於銀青貴服。金鉉重名。勳績無聞。豈宜濫及。伏乞賜寢前命。俯亮愚衷。微臣遂知止之宜。聖朝無不稱之服。名器斯慎。退讓有聞。遐邇聆風。孰不知勸。其新授官告。謹重封進。無任懇禱屏營之至。

謝平章事表

臣某言。伏蒙獎拔。超踐鈞衡。慮玷大猷。味死陳讓。再奉嚴旨。不令固辭。恩厚命輕。位高責重。中謝。臣聞天

下安危。注意將相。處論道具瞻之地。當總戎作鎮之權。雖協夢而求。無開秉鉞之寄。登壇以拜。不兼調鼎之榮。授受惟艱。伊昔猶爾。況臣庸瑋。何以克堪。陛下玄造曲成。大明私照。俾掌戎律。復參廟謨。寵光之崇。在臣已極。毫髮之效。於國何施。謹當罄竭微誠。奉遵至教。仗天威以懾不類。敷聖澤以遂羣生。上分旰食之憂。下塞素餐之責。力誠不足。心實念茲。伏乞皇明。俯賜昭鑒。臣恪居官次。遐守藩維。不獲伏謝彤庭。陳露丹慊。心存闕下。同犬馬之戀恩。身在淮濱。仰雲天而結思。無任懇悃屏營之至。

謝手詔表詔後批云。朕自書。

臣某言。中使閻忠信至。奉宣聖旨存問。兼賜臣手詔。拜捧紫泥。跪伸金簡。承旨見聖神之略。感恩知身命之輕。中謝臣素乏異能。幸逢昌運。猥當旄鉞之寄。未靖祲氛。榮分台鼎之名。何階啓沃。竊位斯久。速尤是虞。豈謂玄化曲成。鴻私荐及。特紆睿思。親灑仙毫。降自九重。粲然五色。初喜麗天之象。遠燭輝光。旋驚垂露之蹤。曲覃霈澤。鸞鳳騫翔。而變態烟雲。舒卷以呈姿。賦彩飛文。聳神蕩目。恭惟國寶。何幸家藏。感極涕零。莫知上答。應緣軍旅庶務。謹具別狀奏聞。無任欣戴屏營之至。

謝貸錢物表

臣某言。中使南宮懷珍至。奉宣聖旨存問。兼賜臣墨詔。天光下濟。叡澤曲流。銜恩未酬。居寵彌懼。中謝臣受任斯極。微功莫施。昨以封略未甯。干戈猶動。壽春固壘。以備盜。淮甸興師。以扞姦。經費所資。數盈鉅萬。餽餉時久。供億力殫。慮始圖終。不敢緘默。輒陳管見。上黷宸聰。伏蒙聖慈。特遂誠請。遠承如綍之旨。特假

聚人之財，軍須不愆，士氣彌振，糗糧既備，永無半菽之虞。襦袴足頒，遠超挾纊之感。是爲說使，咸願先登。臣忝總戎，倍百欣荷。伏以上分國用，俯濟軍興，候清煙塵，謹償納。

請赴行營表

臣某言：臣自守淮濱，已周星紀，虔奉朝典，粗安遐方。素效未聞，新恩荐及。身曳兩綬，寄深一隅。蚊納負山，力誠不足。鷹鷂逐鳥，志則有餘。臣再授兵符，夙參軍幕，被堅執銳，雖未經於戎行。制勝伐謀，一作受制代謀亦嘗習於事業。自忝藩翰，屬時清平，無施汗馬之勞。但詠囊弓之什，今則幸遇殊獎，委之專征。以身牽先，是臣素志。況聞徐州士衆，本無叛心。倉卒之間，危疑至此。臣請自臨疆場，親領紀綱，裂帛繫書，諭其禍福。椎牛饗士，養以威聲。冀宣皇風，煦茲蠢類。以忠義感協從之伍，以含宏安反側之徒。革面悛心，期乎不日。其揚州留務，請令行軍司馬路應權知。伏乞聖慈，俯賜昭鑒。

謝兵馬使朱鄭等官表

初除侍御史，續除中丞，封異姓王。

臣某言：奏事官韋溫迴，特蒙聖恩，重賜朱鄭等官告。宸象昭回，煥然下燭。榮分右職，光賁遐藩。中謝臣伏以朱鄭朴忠爲心，沈毅見色。當建封禦侮之寄，見張愔孩提之年。昨者隸職徐州，分鎮蘄縣。釋騷之際，鯁亮彌彰。歷險而來，寔繁其旅。詳探本末，有足褒稱。輒具奏聞，恐須獎勸。伏蒙叡鑒，俯亮微誠。優詔先行，已階直指之列。殊私荐至，超升獨坐之崇。戶領三千，爵踰五等。恩生非次，感異常倫。輪門有光，武旅增氣。遂使感激之士，希勇爵以捐軀。猖狂之徒，聆聖澤而悛性。風行草偃，其勢必然。臣忝總戎，靡倍百欣荷。

賀復吳少誠官爵表

臣某言中使宋惟澄至奉宣聖旨存問兼賜臣墨詔及昭示洗雪吳少誠等事天地宏覆燾之恩雷雨施
渙汗之澤瑕累咸滌危疑獲安中謝臣伏以少誠擅興兵弋事生詿誤自王師致討天威下臨曾無悖辭
亟聞引咎初懷疑懼雖擁衆以偷生旋感聖神屢拜章而請命陛下仁深解網慮軫納隍念餽餉飛輓之
勤閱戰爭暴露之苦舉茲宥過之典副彼效順之誠一方承再造之恩九有覩惟新之化敷鴻霈而覃及
蠢類鼓仁風而臻於大和罷柝銷鋒自茲而始臣謬膺重寄虔守遐藩不獲稱慶瑤堦陳露丹懇仰瞻宸
極倍百常情無任慶抃屏營之至

賀除虔王等表

臣某言中使李國真至奉宣聖旨存問兼賜臣墨詔鴻澤浹下大明燭幽曉諭便蕃慰安稠疊中謝臣伏
覩天書恭承睿旨宏愛人屈己之道酌因時適變之宜擇賢王作鎮徐方俾張悖便主留務上則成邦家
盤石之固下則副士衆拜章之請咸藩之寄斯重舊勳之祀獲全丕變猖狂之徒咸躋仁壽之域既宏在
宥坐見止戈率土人臣孰不欣說臣素乏方略謬荷寵光猥塵將相之名無施分寸之績遭逢若此報效
蔑聞官謗已興渥刑宜及陛下恩深覆載道務含宏恤公私餽餉之勤念吏士鋒鏑之苦特紆神算昭發
德音危疑獲安制置惟固好生宥過誠陛下開網之仁尸位無功重徵臣素餐之責周章跼蹐胡顏自安
但以遐守蕃條恪居官次不獲仰謝雲陛陳露血誠未遂周任知止之言敢逃臧文竊位之咎無任戰越

之至。

慰義陽公主薨表

臣某言。伏承義陽公主薨。伏惟聖懷。傷悼增切。伏以公主。妍姿令則。冠絕天人。稟教皇宮。已挺柔嘉之德。降嬪卿族。益彰貞粹之儀。方期作範。壺闈長榮。邸第豈意。遘茲短歷。奄謝昌辰。伏慮陛下。軫念未捐。深慈莫遣。有虧常膳。罷設宮懸。臣子之情。不任惕戀。況聖凡禮異。邦家制殊。伏願道齊彭殤。理達修短。割肌膚之愛。慰寰海之心。率土人臣。孰不想慰。無任懇款屏營之至。

慰王太尉薨表

臣某言。伏承成德軍節度使。太尉兼中書令。王武俊。今月某日薨。沒伏以武俊。生逢昌時。天授忠節。奮揚義勇。茂建勳庸。秩冠朝端。參燮和於台鉉。姻連戚里。承嘉慶於雲霄。榮掩華夷。事高今昔。方膺作翰之寄。遽迫歸泉之期。鼎臣云亡。梁木斯壞。伏惟陛下。君臣義重。存沒感深。臨冊祕以興懷。聽鼓鼙而軫念。臣恪居官守。奉慰無階。悲慟之誠。有加常品。謹遣某官某乙奉表陳慰以聞。

劉賓客文集卷十二

表章爲淮南杜相公佑修

謝冬衣表

臣某言。中使王國清至。伏奉聖旨。慰勞臣及將佐、官吏、僧道、耆壽、百姓等。并賜臣墨詔。及冬衣兩副。大將衣四副者。大明昭回。遠燭下土。殊錫稠疊。延及偏裨。慶抃失圖。捧戴相賀。云云。臣謬承委寄。獲守藩條。灰瑣屢移。塵露無補。陛下至仁天覆。玄化風薰。頒以兼衣。賁茲瑣質。降自天府。光於轅門。絨膝旣開。靚綵章之盛飾。蹈舞而服。發溫煖於祁寒。愧塵補袞之名。更荷解衣之賜。恩波下浹。將校同霑。共戴殊榮。咸思竭節。生成是荷。雨露難酬。無任懇悃。慙荷之至。

謝濠泗兩州割屬淮南表

臣某言。伏奉十一月二十九日詔書。其濠泗兩州。令臣依前收管。臣謬承寵光。作鎮淮海。位均九伯。權總十連。內省無堪。常恐不逮。豈謂恩私。曲被封略。有加。慙無報政之勤。重受分憂之寄。伏以兵戈方息。閭里未安。謹當奉宣皇風。慰彼黔首。且責成於牧宰。期不失於澄清。伏惟聖明。俯賜昭鑒。無任感戴屏營之至。

謝歷日面脂口脂表

臣某言。中使霍子璘至。奉宣聖旨。存問臣及將佐、官吏、僧道、耆壽、百姓等。兼賜臣墨詔。及貞元十七年新

歷一軸。臘日。面脂口脂。紅雪紫雪。并金花銀合二。金稜合二。皇明遠燭。殊錫荐臻。抃舞失容。捧戴無措。伏惟皇帝陛下。立極御人。一作天。順時布政。禮崇大蜡。澤浹遐藩。臣叨榮日深。竊位時久。謬回宸眷。猥降玉人。天書下臨。視三光之照耀。玉歷爰授。知四氣之環周。雕奩既開。珍藥斯見。膏凝雪瑩。含液騰芳。頓光蒲柳之容。永去癘疵之患。命輕恩重。上答何階。無任感抃屏營之至。

謝墨詔表

臣某言。中使陳日華至。奉宣聖旨存問。兼賜臣墨詔。又以臣所奏羅珣及裴靖政理有方。今各賜手詔激賞者。恩降重霄。澤流下土。義存獎勸。榮冠等夷。臣昨以羅珣。裴靖。勵精吏理。效用著明。人感說安。俗致殷阜。恐須甄錄。以勸在官。輒獻封章。具陳成績。伏蒙叡鑒。俯亮愚衷。嘉理行之尤光。示絲綸之深旨。守道者益以固志。懷慝者由是悛心。激俗化人。於茲爲大。臣謬司廉問。職在澄清。幸遇旌善之時。獲免蔽賢之責。無任欣感之至。

論廢楚州營田表

臣某言。中使曹進玉至。奉宣聖旨存問。兼賜臣墨詔。以楚州營田廢置事。令臣商量奏來者。跪奉天書。恭承叡旨。道存致用。義在隨時。云云。伏以本置營田。是求足食。今則徒有糜費。鮮逢順成。刈穫所收。無裨於國用。種糧每闕。常假於供司。較其利害。宜廢已久。比來循守舊制。不敢輕有上陳。皇明鑒徵。特革斯弊。取其田蓄。授彼黎蒸。仍俾薄租。誠爲至當。但以田數雖廣。地力各殊。須量沃瘠。用立程度。臣已追里正。與商

量利便。謹具別狀奏聞。伏惟聖慮俯賜詳擇。無任震越屏營之至。

請朝覲表

臣某言。臣聞臣之事君。有犯無隱。懇誠所至。敢不罄陳。伏惟聖明俯賜矜察云云。臣代受國恩。忝承門蔭。脫巾筮仕。敢期榮名。陳力效官。靡樹聲績。始因孤直。驟歷清班。復加朝獎。作藩外府。遠違輦下。十有四年。恪守淮瀆。逮今一紀。犬馬懷戀。寢興匪遑。蒲柳易衰。遲莫俄及。竊位時久。妨賢愧深。況歷官已來。四十八考。祇奉朝謁。時纔二周。服勤郡符。荏苒垂老。屏營魏闕之思。夢想承明之迹。如迫餒寒。不忘衣食。伏惟睿鑒俯亮愚衷。蚤賜擇人。與臣交代。一作替交受之際。冀無可虞。然後脂車。奔赴京輦。微願斯畢。雖死猶生。臣頃以戎務方殷。猥加宰輔。今既事罷。實慙此名。爲有藩鎮同時。未敢輕上印綬。伏以聖朝赫奕。左右惟賢。漢愧得人。周慙多士。臣才略既短。齒髮又衰。柄用之地。甘心自絕。所冀退歸舊里。沐浴皇風。絕鐘鳴漏。盡之譏。展維桑與梓之敬。匪惟名器不假。實貴骸骨可全。知止之心。神祇所鑒。無任懇悃。怔營之至。

謝春衣表

臣某言。中使陳日華至。伏奉聖旨。慰勞臣及將佐官吏僧道耆壽百姓等。并賜臣墨詔及春衣兩副。大將衣四副。王人捧詔。御府降衣。寵光不隔於遐藩。慶賜猥霑於裨將。臣素乏器能。謬膺驅使。每慙效薄。常懼食浮。陛下覃以至仁。均其厚施。宰元和而布澤。順時律以頒衣。出自禁中。賁於臣下。執領檜而抃舞。失次被纖柔而顧眄。增輝舉體。動容既安。且吉在身。不稱恐招鶴翼之譏。居位無功。叨受鶴紋之賜。下延將校。

同荷生成。

謝賜門戟表

臣某言。臣得進奏官裴遵狀報。本月九日。軍器使梁延壽奉宣進止付所司。準省牒賜臣門戟十二竿者。恩降雲天。榮加門戶。承旨慶抃。省躬慙惶。伏以禮著等威。朝有命數。是詔懋賞。必在疇庸。臣謬荷寵光。素無績效。旌旄之寄。已忝外藩。榮戟爰列。更光私第。賁於棖闥。慶及子孫。覩茲盛儀。實愧虛受。無任欣載屏營之至。

謝男師損等官表

伏見今月一日。制授臣長男師損。祕書省著作郎。次男式方。太常寺主簿。又得進奏官裴遵狀報。伏承聖恩。特降中使。送官告到臣宅。分付師損者。寵渥非常。授任不次。驚躍無措。覩懼失容云云。臣謬分重寄。獲守外藩。受恩既深。無績可紀。男師損等器惟凡品。教闕義方。蚤沐叡慈。已階官次。每懷塵忝。常誠滿盈。豈謂鴻需曲覃。大明私照。寬臣尸素之責。念臣葵藿之誠。下延胤息。叨踐班級。天書出禁。中貴臨門。榮冠等夷。慶流宗族。況著作乃論撰之地。唯史才是居。太常寔禮樂之司。非儒者勿履。顧茲庸昧。忽此超昇。內省慙惶。若墜冰谷。伏以聖朝立制。建官惟賢。名實無乖。輪轅盡適。微臣父子。獨爲幸人。非據踰涯。自中徂外。虛受邱山之賜。實增負乘之憂。進退彷徨。不知所據。無任戰汗屏營之至。

謝端午賜衣及器物等第一表

臣某言。中使劉光弼至。奉宣聖旨。慰勞臣及將佐。官吏。僧道。耆壽。百姓等。兼賜臣墨詔。并衣一副。金花銀器三事。綵絲一作絲索一軸。大將衣四副。綵絲五軸。寵光薦至。慶賜曲霑。抃舞失容。捧戴無力。伏以朱明仲月。端午佳辰。萬國被薰風之和。九天垂湛露之澤。臣幸逢休運。獲守外藩。叨承叡慈。猥受榮賚。發詔而煥窺宸象。振衣而頓失炎威。色絲表祥。載光於佩服。珍器充玩。盡飾於圓方。恩輝既盈。喜懼交集。下延裨將。共荷鴻私。無任感戴之至。

謝墨詔表

臣某言。中使陳日華至。奉宣聖旨。慰勞臣及將佐。官吏。僧道。耆壽。百姓等。兼賜臣墨詔。恩降紫泥。澤流下土。跪奉自天之命。遙馳一作傾捧日之心。云云。伏以皇帝陛下。凝旒穆清。軫念黎獻。已洽雍熙之化。尙存宵旰之勤。遠降王人。特紆宸翰。慰安稠疊。曉諭使蕃。任重力微。不知上答。應緣戎旅庶務。謹具別狀奏聞。伏乞皇明。俯賜詔鑒。無任感戴屏營之至。

劉賓客文集卷十三

表章爲淮南杜相公佑修

爲杜司徒讓度支鹽鐵等使表

臣某言。伏奉制書。授臣檢校司徒。同中書門下平章事。充度支及諸道鹽鐵轉運等使者。臣久塵高位。尸素已多。更受新恩。滿盈爲懼。云云。伏惟皇帝陛下。紹登寶位。光纂鴻猷。擢用之間。華夷聳聽。況利權所在。宜適變通。國計是資。須明輕重。當至化鼎新之日。是微臣遲莫之年。將何以上副宸衷。下成庶務。進退惟谷。冰炭在懷。輒罄愚誠。冀回天監。陳力無補。庶遵周任之言。循涯若驚。敢飾范宣之讓。慙惟跼蹐。倍萬常情。謹奉表陳讓以聞。

爲杜司徒謝追贈表

臣某言。伏奉制書。褒贈臣亡父先臣某官尚書左僕射者。時逢霈澤。禮極徽章。云云。臣家受國恩。至臣累葉。常懼不克負荷。以忝前人。豈意多幸。遭逢猥居高位。陛下應乾御極。作解庇人。恩浹寰區。禮成宗廟。垂仁布德。自葉流根。紫書忽降於重霄。密印榮加於厚夜。星霜增感。蒸嘗有輝。非臣殞越。所能上報。無任感咽屏營之至。

爲杜司徒讓淮南立去思碑表

臣某言。伏見淮南節度使王鏐所奏。當道將吏僧道耆壽等。請爲臣立去思碑。伏奉聖旨。允其所奏。臣內惟菲薄。聲績無聞。祇荷恩私。慙懼交至。云云。臣伏蒙先朝過獎。累典方隅。頃鎮江都。十有四載。數周星紀。水旱備經。境捲一作接淮濱。兵戈時起。至於邑里。粗免流離。非臣所能。悉稟聖化。在唐堯可封之日。奚假吏師。當漢宣責實之時。皆承詔旨。王鏐與臣交代。輒有上聞。況以去思爲名。慙無可紀之績。伏以建碑有制。甲令垂文。苟非至公。翻益貽誚。臣伏覽故事。宋璟自廣州都督入爲尚書。南海之人。請爲刊石。璟自遜讓。至於再三。雖勒其文。竟從降制。著在國史。垂爲美談。璟非苟榮。人益見德。臣才誠不逮。心實慕之。伏乞聖慈。賜寢前命。臣情非飾讓。義在徇公。云云。

爲京兆李尹賀遷獻懿二祖表

臣某言。伏見詔書。以今月某日。奉遷獻祖。懿祖。神主。祔於德明興聖皇帝廟。盛禮云畢。宗祧永安。云云。伏以太祖景皇帝。膺期撫運。啓封於唐。爲百代不遷之宗。開三靈眷命之兆。頃以本朝初建。清廟備儀。二祖冠西室之先。景皇闕東向之位。諸儒獻議。歷載未行。陛下濬發叢謨。旁延正論。爰詔多士。會於中臺。酌三禮之前文。參百王之故事。講貫斯定。詢謀僉同。撰日一作備物展儀。考祥視履。配貴神於遠祖。正尊位於始封。廟貌有嚴。禘嘗允穆。示人以孝。得禮之中。旣觀秩秩之容。必降穰穰之福。臣職居內史。屬忝本枝。躬導盛儀。獲申誠敬。無任感說屏營之至。

爲京兆韋尹賀雨止表 夏 嗣

臣某言。今月某日。中使吳文政奉宣聖旨。緣今年雨多。恐傷苗稼。諸有靈跡處。並宜祈禱者。臣謹檢尋祀典。方議徧祠。惟德動天。倏已澄霽。伏以至教惠農。兆人務本。今歲宿麥。茂於常年。爰自季春。遂逢多雨。蓋陰陽常數。有以推遷。而隴畝之間。未聞傷敗。陛下勞謙思切。覆育恩深。或慮成災。先期軫念。昭薦未陳。於方社。歡誠已格。於上玄。文明煥開。陰晴潛掃。有年之慶。實兆於茲辰。先天不違。夙超於前代。臣謬司京邑。虔撫蒸黎。欣抃之誠。倍百羣品。無任踴躍屏營之至。

爲京兆韋尹賀祈晴獲應表

臣某言。今月十七日。中使某奉宣聖旨。以霖雨未晴。諸有靈跡處。並令祈禱者。臣當時於興聖寺竹林神。親自祈祝。兼差官城外。分路徧祠。伏以神祇效靈。景物澄霽。兆庶覩動天之德。大田俟多稼之期。臣謬荷恩輝。忝司京邑。抃說之至。實倍常情。

爲京兆韋尹謝許折糴表

臣某言。伏奉詔旨。以臣所請畿內折糴。宜令度支計會定數奏來者。天慈廣被。人瘼是求。臣自理京邑。不先威刑。唯務便安。所期富庶。每因賜對。常奉德音。府縣之間。巨細令奏。伏以聖明在上。風雨應時。順成之年。穀糴常賤。若無輕重之法。必利兼并之家。輒敢上聞。請行折糴。天光下燭。人隱無遺。宜付所司。允臣所奏。事關理本。惠及生靈。臣忝尹京邑。倍百欣荷。無任歡躍屏營之至。

爲京兆韋尹賀元日祥雪表

臣某言。伏以去冬已來。久無雨雪。臣每於內殿。親奉德音。以宿麥未滋爲虞。以兆人生疾爲念。聖情所屬。神理潛通。獻歲發春。佳雪肇降。當夷夏會同之日。觀天人合應之徵。迎喜氣於三元。浹歡心於萬國。羈羸永息。豐阜可期。臣以疾疢未平。步趨有阻。伏蒙恩貸。已具奏聞。謹於光宅寺中。管當本務。不獲隨例。稱慶明庭。既覩嘉祥。益彰聖德。無任欣躍屏營之至。

爲京兆韋尹賀春雪表

臣某言。伏奉詔旨。充某郡主禮命使。謝恩之日。親承德音。以春初已來。雨雪猶少。慮妨農事。有軫容慈。今當下嫁之辰。克致上玄之感。雲生河漢。及佳期而降祥。雪滿寰區。應豐年而呈瑞。臣官當撫字。職在肅雍。慶抃之誠。實倍常品。

爲京兆李尹賀雨表

臣某言。伏奉詔旨。以時雨愆候。有妨耕農。應諸有靈跡處。並令祈請者。德音才發。膏雨驟飛。滂霈已周。動植咸說。云云。伏以久愆時澤。上軫聖慈。爰命禱祈。俾申誠敬。神應如響。天且不違。未興雲漢之詩。已致桑林之雨。臣謬司京邑。虔撫黎蒸。觀豐年之可期。同比屋而稱慶。無任欣抃之至。

爲李中丞謝賜紫雪面脂等表

臣某言。中使某乙。至奉宣聖旨。賜臣紫雪紅雪面脂。口脂各一合。澡豆一袋。特降王人。俯臨私第。御恩慶抃。省已慙惶。云云。臣謬荷寵私。素無績效。空變星霜之候。猥霑慶賜之恩。跪捧雕奩。榮觀珍藥。功能去疾。

永絕於癘疵。澤可飾容。頓光於蒲柳。生成是荷。雨露難酬。無任感戴。

爲李中丞謝鍾馗歷日表

臣某言。中使某乙至。奉宣聖旨。賜臣畫鍾馗一新。歷日一軸。恩降雲霄。光生里巷。雖當歲莫。如煦陽和。云伏以將慶新年。聿循故事。績其神象。表去癘之方。頒以歷書。敬授時之始。微臣何幸。天意不遺。無任感戴。屏營之至。

爲杜相公謝鍾馗歷日表

臣某言。高品某乙至。奉宣聖旨。賜臣鍾馗一新。歷日一軸。星紀方回。雖逢歲盡。恩輝忽降。已覺春來。云云。伏以圖寫威神。驅除羣癘。頒行律歷。敬授四時。施張有嚴。旣增門戶之貴。動用協吉。常爲掌握之珍。瞻仰披尋。皆知聖澤。無任欣戴之至。貞元二十一年十二月日。

爲武中丞謝新茶表 元衡

臣某言。中使竇國安奉宣聖旨。賜臣新茶一斤。猥降王人。光臨私室。恭承慶賜。跪啓緘封。云云。伏以方隅入貢。採擷至珍。自遠爰來。以新爲貴。捧而觀妙。飲以滌煩。顧蘭露而慙芳。豈柘漿而齊味。旣榮凡口。倍切丹心。無任歡躍感恩之至。貞元二十年三月日。

爲武中丞謝春衣表

臣某言。中使某乙奉宣聖旨。賜臣春衣一副。王人臨第。御府降衣。抃舞失容。捧戴無措。云云。伏以律當春

莫慶合時邕。萬物被薰風之和。九天垂湛露之澤。臣受任非次。速尤是虞。方懷匪服之憂。更荷解衣之賜。恩加盡飾。拖朱紫而爲榮。受非以庸。顧形影而增愧。丹誠徒罄。玄造難酬。無任踴躍屏營之至。

爲武中丞再謝新茶表

臣某言。中使某乙奉宣聖旨。賜臣新茶一斤。猥沐深恩。再霑殊錫。承旨慶抃。省躬慙惶。伏以貢自外方。珍殊衆品。效參藥石。芳越椒蘭。出自僊廚。俯頒私室。義同推食。空荷於曲成。責在素餐。實慙於虛受。

爲武中丞謝新橘表

臣某言。中使某乙至。奉宣聖旨。賜臣新橘若干顆。特降恩光。猥頒慶賜。珍踰百果。榮比兼金。伏以丹實初成。苞貢爰至。芬馨味重。方列於御筵。雨露恩深。忽霑於賤品。感同推食。事等絕甘。豈唯適口爲珍。實冀捐軀上答。

爲武中丞謝柑子表

臣某言。中使某乙至。奉宣聖旨。賜臣柑子若干顆。特降殊私。再頒名果。自遠稱貴。以新爲榮。伏以方貢外來。人間未覩。黃苞輝穎。彫俎增華。芬芳初佐於大庖。慶賜遂沾於凡口。甘踰萍實。剖食旣同於楚謠。寒比柘漿。析醒何慙於漢史。感恩思效。倍百常情。

爲武中丞謝冬衣表

臣某言。中使某乙至。奉宣聖旨。賜臣冬衣一副。恩降重霄。榮加陋質。承旨慶抃。省躬慙惶。臣受任已來。微

效莫著。每更時律。慙曠官常。豈謂玄造曲成。鴻私荐及。念茲戒寒之候。錫以禦冬之衣。抃舞失容。顧眄增飾。鶴紋是錫。遠慙晉代之賢。鶴翼不濡。實懼曹風之刺。無任感戴屏營之至。

劉賓客文集卷十四

表章 牋附

爲容州竇中丞謝上表

羣時在朗州相達因以見託

臣某言。伏奉某月日制書。授臣容州刺史兼御史中丞。充本管經略招討等使。臣發開州日。已差某官某乙奉表陳謝。伏以道途遐阻。水陸縈紆。臣以今月某日到本任上訖。謹宣聖旨。慰諭遠人。臣本書生。素無吏術。頃因多幸。賁自邱園。累沐聖慈。驟居清貴。識昧通變。動乖事宜。愧無善狀。以塞公責。伏惟叡聖文武皇帝陛下。凝旒穆清。洞照寰海。推共理之義。分寄股肱。念蒸人之勤。溥宥遐邇。察臣前任事實。恕臣本性朴愚。賜以恩輝。拔於廢棄。遠辭偏郡。重委方隅。捧印綬以爲榮。望闕庭而增戀。雖到官之始。惠未及人。而率下之誠。務先克己。凡施政教。皆稟詔條。參以土宜。遂其物性。可行必守。有弊必除。使蠻夷生梗之風。慕臣子盡忠之道。力誠不足。心實在茲。伏乞聖明。俯賜昭鑒。無任感戴屏營之至。元和八年云云。

謝中使送上表

臣某言。中使吐突仕曉至。奉宣聖旨。慰諭。并送臣至本任者。深山遠郡。忽降王人。跪受恩榮。仰瞻宸極。伏以發自巴峽。至於南荒。涉水陸湍險之途。當炎夏鬱蒸之候。山川縈轉。晨夜奔馳。幸無它疾。得至本管。九重結戀。遙傾捧日之心。萬里獲安。皆荷自天之祐。無任感戴屏營之至。

賀收蔡州表

臣某言。伏見詔書。以唐州節度使李愬。生擒逆賊吳元濟獻俘。文武百寮。於興安門列班稱賀者。天威遠被。元惡就誅。一方旣平。萬國咸慶。伏惟叡聖文武皇帝陛下。德超邃古。道合上玄。臨御已來。天人協贊。削平吳蜀。掃蕩塞垣。車書大同。夷狄來貢。叢爾元濟。敢懷野心。輒聚犬羊。苟偷時月。陛下聖謨獨運。叡感潛通。天助神兵。人生勇氣。旣擒兇逆。遂正刑書。伏三紀之逋誅。成九衢之壯觀。宗社昭告。華夷式瞻。行弔伐而在禮無違。烜威聲而何城不克。楚氛改色。淮水安流。漢上疲人。盡霑雨露。汝南遺老。重覩昇平。凡在具臣。孰不欣抃。臣久辭朝列。忝守遐藩。不獲稱慶闕庭。陳露丹悃。仰瞻宸極。倍萬羣情。無任踴躍慶快之至。元和十二年十二月二十三日。

賀赦表

臣某言。伏奉今月一日制書。大赦天下者。聖德廣運。浹於華夷。天光下臨。照彼幽蟄。伏惟叡聖文武皇帝陛下。神扶寶祚。天贊鴻猷。意有所之。事無不克。當淮右一作甸凱旋之後。是城中慶幸之時。順陽和以發生。施霈澤於寰海。網開三面。危疑者許以自新。耳達四聰。瑕累者期於再錄。求碩畫於庶位。慮遺材於放臣。旌忠烈之家。賞勳庸之胤。仁及枯骨。無隔於寇戎。榮加顯親。晉害於存沒。恤刑已責。實廩蠲徭。頒錫彰有客之詩。崇儒協宗予之望。岳瀆咸秩。耆艾飲和。大僚承任子之恩。武旅荷賜金之寵。斯皆禹湯文武之遺美。高祖太宗之耿光。集於聖朝。然後大備德音所至。和氣隨之。歡謠上徹於九天。福祚永延於億載。能使

遠夷屈膝。豈惟小醜革心。率土人臣。不勝大慶。臣久辭闕下。恪守海隅。犬馬之誠。倍百常品。無任抃躍屏營之至。

賀赦牋

使持節連州諸軍事。守連州刺史。劉某惶恐叩頭。伏見今月一日。制書大赦天下者。伏以獻歲布和。皇恩遠降。乾坤交泰。寰海廓清。伏惟皇太子殿下。道冠元良。德兼忠孝。承顏拜慶。榮耀古今。某職守有限。不獲隨例稱賀宮庭。無任欣說之至。元和十三年正月二十九日。

賀雪鎮州表

臣某言。伏見四月二十七日德音。以王承宗效順著明。復其官爵。所獻二郡。別置藩垣。聖德動天。鴻恩及物。瑕累咸滌。蒸黎永安。伏惟叡聖文武皇帝陛下。自承寶位。克振皇綱。既以四海爲家。每念一夫不獲。昨因大慶。爰降殊私。廣宥過之私。開自新之路。綸言一發。神聖潛通。遂令詿誤之徒。頓釋憂危之慮。命胤子以入侍。獻名都以效誠。臣心既明。天網爲解。因祈四郡。別爲一方。惟懷永圖。盡去前弊。大河以北。化爲禮樂之鄉。率土之濱。重見昇平之日。臣恪居官次。遐守嶺隅。不獲稱慶闕庭。無任踴躍屏營之至。

賀平淄青表

臣某言。伏見制旨。魏博節度使所奏。逆賊李師道。并男二人。並梟斬訖。以二月十六日。御宣政殿受賀者。聖德玄運。兵威神速。旬月之內。黥鯢就誅。秦嶽旣甯。登封有日。伏惟叡聖文武皇帝陛下。有征必克。舉意

無違。天地協神算之期。靈靈助成師之氣。蠢爾孽豎。敢生野心。蕭斧一臨。妖氛自滅。皆由聖慈廣被。叡略潛通。獻俘者盡。許生還。得地者復。令安堵。感我仁化。激其深衷。凡是脅從。盡思效節。五紀巢穴。一朝蕩夷。遂使齊魯之鄉。復歸仁壽之城。捷書既至。傳首繼來。備文物於明庭。告殊勳於清廟。百郡陳賀。萬方會同。從此止戈。所以爲武。西周士庶。方觀飲至之容。東嶽煙雲。已望告成之禮。臣恪居遠服。嘗忝班行。慶快之誠。倍萬羣品。無任踊躍屏營之至。元和十四年三月二十四日。

夔州謝上表

臣某言。伏奉某月日制書。授臣使持節都督夔州諸軍事。守夔州刺史。跪受天詔。神魂震驚。伏惟文武孝德皇帝陛下。垂衣穆清。叡鑑旁達。三統交泰。百神降祥。浹於華夷。盡致位壽。臣家本儒素。業在藝文。貞元年中。三忝科第。德宗皇帝記其姓名。知無黨援。擢爲御史。在臺三載。例遷省官。權臣奏用。分判錢穀。竟坐連累。貶在遐藩。先朝追還。方念淹滯。又遭讒嫉。出牧遠州。家禍所鍾。沈伏草土。禮經有制。羸疾僅存。甘於畎畝。以樂皇化。伏遇陛下。大明御宇。照燭無私。念以殘生。舉其彝典。獲居善部。伏感天慈。臣卽以今月二日。到任上訖。峽水千里。巴山萬重。空懷向日之心。未有朝天之路。無任感恩戀闕之至。長慶二年正月五日。

賀册皇太子表

臣某言。伏見制書。以十二月二十日。册皇太子。盛禮斯畢。德音遐宣。萬國以貞。庶類咸說。伏惟文武孝德

皇帝陛下體元立極。垂訓御時。既闡王猷。思安國本。前星位定。拱宸極以昭彰。蒼震氣宣。與天地而長久。禮光七鬯。澤被華夷。宗祐有無疆之休。生靈懷莫大之慶。臣恪居官次。遐守巴南。不獲稱賀闕庭。無任踴躍屏營之至。長慶三年正月日。

慰國哀表

臣某言。上天降禍。大行皇帝奄棄萬國。奉諱號。靡潰五情。伏惟皇帝陛下。孝思至性。攀號罔極。臣恭守所部。不獲陪位西宮。伏增感慕之至。僅奉表陳慰以聞。長慶四年二月日。

賀登極表

臣某言。伏見詔書。正月二十六日。皇帝陛下。嗣登寶位。萬國同歡。日月繼明。乾坤交泰。伏惟皇帝陛下。欽承顧命。惟懷永圖。以大孝奉宗祧。以至仁蘇品物。洞照寰海。統和神人。聖祚延長。從今無極。羣生鼓舞。自此大甯。臣限守遐藩。恪居官次。不獲奔馳拜舞。稱賀闕庭。無任抃躍屏營之至。長慶四年二月日。

賀皇太子牋

使持節都督夔州刺史劉某叩頭。伏惟皇太子殿下。祇膺詔冊。光啓儲闈。展至性於三朝。承本枝於百代。宗祐永固。神人以和。四嶽仰維嵩之高。百川承少海之潤。某限以職守。不獲隨例稱慶宮庭。無任抃躍之至。

賀赦表

臣某言。伏見今月三日。制書大赦天下者。大明初昇。萬物咸覩。渙汗一發。神人以和。伏惟皇帝陛下。天資
觀聖。神啓昌期。端拱受萬國之朝。承顏奉兩宮之慶。初嗣大位。克揚孝心。三光協明。和氣來應。臣伏讀赦
令。首於奉園陵。盡誠敬。親九族。蘇兆人。次及定章程。止進獻。已逋責。滌夙瑕。內照於九重。則歸嬪嬙。放鷹
犬。外明於四目。則求隱士。開直聲。柔遠以仁。則還其係虜。賞延以禮。則澤及後昆。菲食遵夏禹之規。弋綈
法漢文之儉。隆典咸舉。舊章再明。昇平之期。正在今日。發號之始。疾於春風。殊私所及。霈若時雨。臣幸逢
昌運。歷事五朝。出守遐藩。僅重二紀。欣承鸞雨。作解之澤。不勝犬馬戀主之誠。瞻望帝鄉。無任屏營懇悃
之至。長慶四年三月二十七日。

賀册太皇太后表

臣某言。伏見制書。以二月十八日。册立太皇太后。徽章克備。慶賜遠行。榮冠古今。澤周寰海。伏惟皇帝陛
下。續承列聖。歡奉兩宮。太皇太后。含飴保和。重光疊慶。漢儀盛於長信。周祚興於大任。方之聖朝。彼有慙
德。臣遠守巴峽。不獲稱賀闕庭。無任抃躍屏營之至。長慶四年三月日。

賀册皇太后表

臣某言。伏見制書。以二月二十五日。册立皇太后。盛禮畢陳。德音遠被。一人有慶。萬國同歡。伏惟皇太后
稟靈作合。誕聖表祥。徽號極域中之尊。慈一作仁爲天下之母。陛下君臨有國。子道無違。長樂宮中。永獻
南山之壽。濯龍門上。再揚東漢之風。率土臣子。不勝歡抃。臣遠守荒服。不獲稱慶闕庭。無任踴躍屏營之

至

和州謝上表

臣某言。伏奉制書。授臣使持節和州諸軍事。守和州刺史。臣自理巴寶。不聞善最。一作政恩私忽降。慶抃失容。伏惟皇帝陛下。丕承寶祚。光闡鴻猷。有漢武天人之姿。稟周成叡哲之德。發言合古。舉意通神。委用得人。動植咸說。理平之速。從古無倫。微臣何幸。獲覩昌運。臣業在詞學。蚤歲策名。德宗尙文。擢爲御史。出入中外。歷事五朝。累承恩光。三換符竹。在分憂之寄。祿秩非輕。而素蓄所長。效用無日。臣聞一物失所。前王軫懷。今逢聖朝。豈患無位。臣卽以今月二十六日。到所任上訖。伏以地在江淮。俗參吳楚。災旱之後。緩撫誠難。謹當奉宣皇恩。慰彼黎庶。久於其道。冀使知方。伏乞聖慈。俯賜昭鑒。臣遠守藩服。不獲拜舞闕庭。無任懇悃屏營之至。謹差當州軍事衙官章興奉表陳謝。以聞。長慶四年十月二十六日。

賀改元赦表

臣某言。伏見今月七日。制書大赦天下者。帝遊出震。聖澤如春。神人以和。天地交泰。伏惟皇帝陛下。丕承鴻業。光闡叡圖。吉日展嚴配之儀。告天陳太平之盛。九廟成禮。百神降祥。鑾輅旋衡。風雲改色。殊私廣被。再宏莫大之恩。寶歷惟新。更啓無疆之祚。兩宮承慶。四海永甯。率土臣子。上干萬壽。臣恪居官次。不獲稱賀闕庭。無任屏營之至。謹差當州軍事衙官。試慈州吉昌府別將徐倫。奉表陳賀。以聞。寶歷元年二月十六日。

夔州論利害表

臣某言。伏準元和十二年四月十八日敕。諸州刺史如有利害可言者。不限時節。任自上表聞奏者。臣伏見貞觀中。詔許羣臣各上書言利便。馬周時一布衣。遂因中郎將常何獻策二十餘事。太宗深奇之。盡行其言。擢周爲御史。至龍朔中。璧州刺史鄧宏慶進平素看精四字。堪爲酒令。高宗嘉之。亦行其言。遷宏慶爲朗州刺史。則知苟有所見。雖布衣之賤。遠守之微。亦可施用。況臣蚤受國恩。德宗朝忝爲御史。逮今歷事四朝。頻領藩條。當陛下至明之時。是微臣竭節之自。伏以守在遐郡。不敢廣有所陳。謹準敕上利害。及當州公務。各具別狀以聞。伏乞聖慈。俯賜昭鑒。無任感激屏營之至。謹差當州軍事衙官守易州安義府別將員外置同正員雲騎尉馮隨。謹奉表以聞。長慶三年十一月七日。

論利害表

臣某言。伏準今年正月五日德音。宜令諸道觀察使。刺史。各具當處利害。附驛以聞者。伏惟皇帝陛下。敕哲自天。纘承列聖。善述先志。發揚德音。率土人臣。不勝慶幸。臣虔奉詔旨。宣示蒸黎。伏以華夏不同。土宜各異。詳求利病。謹具奏聞。伏乞聖慈。俯賜昭鑒。臣伏覽國史。竊見開元十八年。朝集使至京。玄宗臨軒。親問利害。時宣州刺史裴耀卿。上便宜事。論轉輸甚詳。竟不行下。至二十一年。耀卿爲京兆尹。再以前事奏論。方見允納。比及三年。漕輸七百萬石。省腳費三十餘萬貫。當耀卿前不見納。必有人非之。及後數年。方展其效。臣僻守遠郡。敢望言行。祇奉詔書。或冀萬一。伏惟明主擇之。無任懇悃屏營之至。長慶四年五月。

劉賓客文集卷十五

表章 牋附

爲裴相公賀冊魯王表

臣某言。伏見制書。以今日冊魯王禮畢。皇家有慶。寶祚無疆。旣榮本枝。克固磐石。伏惟皇帝陛下。德符列聖。道冠前王。孝敬承兩宮之歡。虔恭奉九廟之祀。先崇大禮。慶浹天人。次念建封。事兼家國。伏以魯王夙承勸訓。特稟天姿。爰擇吉辰。光膺寵冊。旣示之以君親之道。又錫之以禮義之邦。寰海聞風。室家相慶。臣自嬰疾疹。已歷旬時。不獲展禮明庭。拜舞稱賀。

爲裴相公讓官第一表并批答

臣某言。臣去久得疾。近日加劇。西夕之景。豈能久留。及其未亂。披露誠懇。臣犬馬之齒。六十有七。壽雖不長。亦不爲短。位忝公台。近十五年。皆由際會。非以才進。常懼官謗。以招國刑。今被病得死。保其始終。爲幸甚厚。豈復咨嗟。所恨者。遇聖明之君。不得佐成太平之化。自量氣力。忽恐奄然。則有微素。無階上達。伏惟聖慈。昭鑒。憐而察之。伏以三公非曠職之地。宰相非臥理之官。伏枕之初。已有陳乞。請罷真一作直食。兼辭貴階。伏蒙優詔。纔遂一事。頻降中使。慰勉再三。專令御醫。旦夕診視。苟安名器。不覺經時。主恩則深。公議不可。伏思陛下臨御之始。宰臣四人。逮今零落。忽已一半。臣且危懼。餘年幾何。唯易直外鎮。獨得無恙。竊

惟此理。權位難居。伏乞賜臣停官。許在家養疾。就閒辭祿。或冀有瘳。害盈福謙。固是神理。儻天眷稠厚。念以伏事多年。臣之所陳。未蒙便遂。則國朝勳舊。以疾辭位者。皆得致仕官。使其家居。足以頤養。既有成例。著於舊章。伏望天恩。特賜哀允。

省表具知。夫爵位崇高。以酬勳德。君臣協契。諒在始終。斯乃前王之令圖。有國之彝典也。況卿輔相容。祖逮於朕躬。履歷四朝。夷險一致。服事君之大節。推濟物之深誠。道光朝倫。行滿天下。倚注之意。豈同它人。屬朕纂歷。御乾興師。伐叛騷動。累歲端憂。靡遑及河朔。載甯郊丘畢事。方欲咨詢元老。康靖生靈。不虞寒暑所侵。勤勞遇疾。雖國醫診視。中使省臨。憂屬之誠。頃刻在念。忽覽章奏。退讓官榮。雖知止之心。則思避寵。而謀猷之體。斯乃爲時寢食之間。勉加頤養。其所陳乞。非朕意焉。

第二表并批答

臣某言。臣所獻章表。發於至誠。伏奉批答。未蒙允許。外負公責。內迫私情。祈於必遂。敢守難奪。臣束髮已來。號爲強力。及其晚節。亦未甚衰。一朝被病。遂至緜惛。臣自思省。得其端倪。非因飲食不節。無有霧露之犯。蓋由才微。而任重。功薄。而賞厚。竊位既久。妨賢則多。以積年之過幸。致今日之沈疾。不能酌損。所以生災。悟雖已晚。情實非矯。伏惟陛下。念其委使之久。察其危苦之詞。特降深恩。救臣不逮。無冒榮之咎。得遂性之宜。物議不形。病心自泰。忍死俟命。披肝再陳。伏乞聖慈。俯賜容納。無任迫切懇倒之至。

省表具知。卿勳績崇高。誠節忠盡。秉心一德。宣力四朝。訏謨緝熙。弼予於理。勤勞事國。啓沃匪躬。功格

道光常所嘉尚。所疾未瘳。勉於善養。勿藥之喜。佇卽痊平。台衮之司。倚卿爲重。乃累陳退讓。殊謂不然。宜體朕懷。卽斷來表。

第三表 并批答

臣某言。得疾踰年。在假三月。再有陳請。未蒙允從。慮其奄忽。銜愧入地。伏惟聖慈。哀而信之。臣聞君之使臣。在知其心。而聽其言。不以容尸祿爲惠也。臣之事君。在無隱情。而盡忠節。不以受非據爲榮也。然後上下交感。終始可詠。臣伏事陛下。五年於茲。葵藿微誠。已蒙識察。桑榆莫景。所冀哀憐。豈今危懼之時。更懼滿盈之禍。雖有藥石。安能調和。聖日雖逢。生涯漸短。體羸無拜舞之望。心在有涕戀之悲。臣伏覽國史。備見前事。太宗朝李靖。高宗朝劉仁軌。皆自宰臣。乞骸致政。其後知猶可用。復起於家。進退之間。曲盡情禮。君臣之際。良史美談。伏望陛下。悉臣至誠。念臣羸病。許遂頤養。以保餘年。俟其有瘳。或冀萬一。無任懇款。遑迫之至。

省表具悉。謝病之制。雖起於昔賢。盡瘁之詞。亦標於古典。況卿有功於國。作相累朝。自匡輔眇躬。又勤勞數載。豈可以微疾去位。以重望辭榮。章疏徒來。延遲彌切。至如太宗朝許李靖致政。高宗遂仁軌乞骸。朕非不知。事則有異。何者。時當明聖在上。理道已成。宰臣優游。固得自便。今則生物尙困。庶工未修。言念勳賢。方深倚注。惟此故事。恐難遽行。卿宜體是誠懷。力更頤養。必有多福。以扶大忠。無至確然。復陳章表。

蘇州謝上表

臣某言。伏奉制書。授臣使持節。蘇州諸軍事。守蘇州刺史。始從郎署。出領郡章。承命若驚。省躬增感。伏惟皇帝陛下。受上玄之眷佑。揚列聖之耿光。大康黎元。慎擇牧守。德音每發。品物咸蘇。臣本書生。素無黨援。謬以薄伎。三登文科。德宗皇帝。擢爲御史。在臺三載。例轉省官。永貞之初。權臣領物。遂奏錄用。蓋聞虛名。唯守職業。實無朋附。竟坐飛語。貶在遐藩。憲宗皇帝。後知事情。卻授刺史。凡歷外任。二十餘年。伏遇陛下。應運重光。物無廢滯。收拾耆舊。塵忝班行。旣幸逢時。常思展效。在集賢院。四喚星霜。供進新書。二千餘卷。儒臣之分。甘老於典墳。優詔忽臨。又委之符竹。分憂誠重。戀闕滋深。石室之書。空留筆札。金閨之籍。已去姓名。本末可明。申雪無路。豈意聖慈宏納。不隔卑微。而辭之日。特許升殿。天顏咫尺。臣禮兢惶。不敢盡言。空懷誠懇。謝恩而出。生光於九陌之間。受訓而行。布政於五湖之外。臣卽以今月六日。到任上訖。伏以水災之後。物力素空。臣謹宣皇風。慰彼黎庶。臣聞有味之物。蠹蟲必生。有才之人。讒言必至。事理如此。古今同途。了然辨之。唯在明聖。伏惟陛下。察臣此言。則天下之人。無不幸甚。江海遠地。孤危小臣。雖雨露之恩。幽遐必被。而犬馬之戀。親近爲榮。大和六年二月六日。

蘇州謝賑賜表

臣某言。伏奉去年二月十五日敕。蘇州宣賜米一十二萬石。委刺史據戶均給者。恩降九天。澤流萬姓。伏以臣當州去年。災沴尤甚。水潦雖退。流庸尙多。臣前月到任。奉宣聖旨。闔境老幼。無不涕零。詢訪里閭。備

知凋瘵。方具事實。便欲奏論。聖慈憂人。照燭幽遠。時有賑卹。救其災荒。蒼生荷再造之恩。儉歲同有年之慶。臣忝爲長吏。倍萬常情。無任感激。抃躍之至。大和六年三月二十四日。

蘇州賀册皇太子表

臣某言。伏奉制書。以今月十日册皇太子。德音遐布。盛禮畢陳。國本永安。人心同慶。伏惟皇帝陛下。以繼天之聖。有知子之明。義兼君親。禮重宗祏。龍樓肇建。展嘉禮於三朝。鳳歷延長。固本枝於萬葉。臣守在遐郡。不獲稱慶闕庭。無任踴躍屏營之至。大和七年八月十七日。

蘇州賀册皇太子牋

朝議大夫。使持節。蘇州諸軍事。守蘇州刺史。上柱國。劉某。叩頭叩頭。伏惟皇太子殿下。允膺上嗣。光啓東朝。蒼蒼發前星之輝。黃離表重輪之瑞。位居守器。禮重承祧。萬國以貞。九圍咸說。某限以守郡。不獲稱慶宮庭。闕

劉賓客文集卷十六

表章

蘇州謝恩賜加章服表

臣某言。伏奉去年十一月二十七日詔書。加臣賜紫金魚袋。餘如故者。恩降重霄。榮霑陋質。虛一作黷陟。明之典。恐與彼已之詩。寵過若驚。喜深生懼。中謝。臣起自書生。業文入仕。德宗朝爲御史。以孤直在臺。順宗朝爲郎官。以緣累出省。憲宗皇帝後知其冤。特降敕書。追赴京國。緣有虛稱。恐居清班。務進者爭先。上封者潛毀。巧言易信。孤憤難申。俄復一麾。外轉三郡。伏遇陛下。膺期御宇。大振滯淹。哀臣宿舊。猥見收拾。職兼書殿。官忝儀曹。微勞未宣。薄命多故。又離省署。重領郡符。延英面辭。親承教誨。銜命卽路。星言載馳。到任之初。便逢災疫。奉宣聖澤。恭守詔條。上稟叡謀。下求人瘼。方術雖短。憂勞則深。幸免流離。漸臻完復。皆承聖化所及。遂使人心獲安。豈由微臣。薄劣能致。臣素乏親黨。家本孤貧。年衰無酒食一作之誤。性拙無博奕之藝。自領大郡。又逢時災。晝夜苦心。寢食忘味。曾經誣毀。每事防虞。唯託神明。更無媒援。豈期片善。上達宸聰。回日月之重光。燭江湖一作之下國。絲綸褒異。苦節旣彰。印綬煒煌。老容如少。望雲天而拜舞。豈盡丹誠。視環玦以裴回。空嗟白首。無任感激屏營之至。大和七年十二月十六日。

蘇州賀皇帝疾愈表

臣某言。臣得本道觀察使報。伏承聖躬痊愈。已於紫宸殿視朝者。一人有慶。萬國同歡。伏惟皇帝陛下。外親萬務。內奉三宮。常懷宵旰之勤。遂失寢興之適。上玄降祐。列聖表靈。百神奔走。以來扶四海精誠。而致感。勿藥有喜。如山永安。宗廟保無疆之休。寰瀛申莫大之慶。臣恪居官次。遐守江干。不獲稱賀闕庭。無任踴躍屏營之至。

汝州謝上表

臣某言。伏奉去年七月十四日詔書。授臣使持節汝州諸軍事。守汝州刺史。兼御史中丞。充本道防禦使。餘如故者。臣久居遠服。戀闕常深。忽降新恩。近鄉爲貴。承旨慶抃。省躬慙惶。臣某誠歡誠喜。頓首頓首。伏惟皇帝陛下。垂衣穆清之中。旁照寰瀛之內。車書所及。動植咸安。臣昨離班行。遠守江徼。延英辭日。親奉德音。知臣所部災荒。許臣到任條奏。共承勅旨。宣示羣黎。減其征徭。頒以賑賜。伏蒙聖澤。救此天災。疲羸再蘇。幼艾同感。二年連遭水潦。百姓幸免流離。交割之時。戶口增長。雖才術不足。於事未周。而憂勞則深。爲衆所悉。臣本業儒素。頻登文科。一作帝命遭一作遠回。再領軍郡。卽以今月二十七日。到任上訖。謹當奉宣皇化。慰彼蒼生。臨汝水之波。朝宗尙阻。望秦城之日。回照何時。無任感激屏營之至。謹差防禦押衙韋禮簡奉表陳謝。

同州謝上表 并批答

臣某言。伏奉去年十月二十三日制書。授臣使持節同州諸軍事。守同州刺史。兼御史中丞。充本州防禦

長春宮等使恩降九重。榮忝三輔。承旨慶忭。省躬慙惶。臣某伏惟皇帝陛下。丕承列聖。光闡鴻猷。氛祲掃除。乾坤交泰。臣幸逢昌運。累沐殊私。空荷生成之恩。甯酬雨露之澤。卽以今月二日。到本州上訖。謹宣叡旨。安慰蒸黎。伏以本州四年已來。連遭旱損。閭閻凋瘵。遠近共知。臣頃任蘇州之年。亦遭大水之後。面辭之日。親奉德音。至於撫綏。皆承聖教。二年之後。百姓獲安。今本部災荒。物力困涸。忝爲長吏。敢不竭誠。卽須條疏。續具聞奏。臣恪居官次。幸接王畿。不獲拜舞彤庭。陳露丹慊。犬馬懷戀。寐興匪甯。瞻魏闕之容。朝天尙阻。望長安之路。近日爲榮。無任感激屏營之至。謹差防禦知衙官。試殿中監楊克乂。奉表陳謝。大和九年十二月二十一日。

批答省表具知。卿任居三輔。職奉六條。累聞問俗之勞。載覽勤人之志。言惟願行。深慰朕懷。勉弘故經。以副憂寄。所謝知。

賀梟斬鄭注表

臣某言。伏奉前月二十五日詔書。示逆賊鄭注已梟首訖。氛妖殄滅。華夏乂安。伏以逆賊鄭注。本出細微。潛懷梟獍之心。兼結兇狂之黨。人倫共棄。神理不容。陛下叡略感通。天人合應。重臣協力。禁旅齊心。指顧之間。猖狂自潰。乾坤交泰。日月增明。凡在人臣。不勝慶快。臣恪居官次。不獲稱賀闕庭。無任欣歡抃躍之至。大和九年十二月二日。

賀德音表

臣某言。伏見今月十六日德音。布告遐邇。天道下濟。人情大安。伏惟皇帝陛下。凝旒思理。垂意一作擇材。以日月無私之光。照寰區有截之內。貴使下情盡達。甯虞厚貌潛謀。一昨李訓鄭注等。敢有逆心。兼連兇黨。陛下叡謀神斷。左右協同。頃刻之間。掃除已定。重臣畢力。禁旅竭忠。氛祲廓清。華夷咸說。言念正刑之外。或有誣誤之徒。再發德音。廣宣聖澤。當星紀回天之日。迎陽和煦物之光。懷危疑者。如山之安。欲告訐者。望風知懼。非同謀者。一切不問。未結正者。三宥從寬。含生之倫。普天同感。臣恪居官次。不獲稱慶闕庭。云云。謹差防禦知衙官朝議郎權知容州都督府司馬孫揚一作奉表。

賀赦表

臣某言。伏奉今月一日制書。改大和十年爲開成元年。大赦天下者。雷雨作解。人神說隨。澤及八荒。網開三面。臣某誠歡誠喜。頓首頓首。伏惟皇帝陛下。上承乾綱。下立人極。用含宏光大之澤。副夷夏會同之心。獻歲改元。惟新景祚。先明首罪。次及羣妖。述叡情以曉萬方。施鴻霈以蘇庶物。恤辜宥過。已責弛征。郡縣之舊弊悉除。賦稅之新規模備。停藩方節獻之禮。以惠疲人。回權管餘羨之財。以資京邑。命使展澄清之志。察言求讜直之材。弓旌賁於邱園。粟帛頒於耆艾。爰以初吉。御於明庭。德音一發於九天。和氣驟周於四海。開物成務。實表於建元。應天順人。永延於億載。臣幸居近輔。先受殊恩。不獲稱慶闕庭。陪榮班次。衆星列位。常拱北辰之光。新歲拜章。遙獻南山之壽。無任抃躍屏營之至。

謝恩賜粟麥表

臣某言。伏奉今月一日制書。以臣當州連年歉旱。特放開成元年夏青苗錢。拜賜斛斗六萬石。仰長吏逐急濟用。不得非時。量有抽斂於百姓者。恩降九天。澤周萬姓。優詔纒下。羣情頓安。臣某誠歡誠喜。頓首頓首。伏以災沴流行。陰陽常數。物力既竭。人心匪遑。輒敢奏開。本求賑貸。皇恩廣被。玄造曲成。既免在田之征。仍頒發廩之賜。臣謹宣赦文節旨。彰示兆人。鼓舞歡謠。自中徂外。臣初到所部。便遇儉時。今蒙聖慈。特有賑恤。主恩及物。已爲壽域之人。衆意感天。必有豐年之應。臣恪居官業。不獲拜舞闕庭。無任感激之至。

慰淄王薨表

臣某言。臣得進奏官楊惕狀報。淄王薨。輟朝三日。伏惟皇帝陛下。德邁前王。情深近屬。憫枝葉之謝。諒切宸衷。割肌膚之愛。何堪聖念。萬方知化。九族歸仁。凡受國恩。伏深悽惻。臣限以藩守。不獲奉慰闕庭。無任屏營之至。

謝恩放先貸斛斗表

臣某言。臣奉五月二十九日敕牒。據度支所奏。諸道節度觀察使及州府借使省司錢物斛斗等數。內當州欠三萬六千二十三貫石。並放免者。殊私忽降。逋責滌除。藩方永安。遐邇咸說。臣某誠歡誠喜。頓首頓首。伏以關輔之間。頻年歉旱。田租既須。矜放公用。又不支持。承前長吏。例有借便。以救一時之急。皆成積欠之名。既未支填。常懷憂懼。聖恩周洽。洞見物情。爰命有司。使之條奏。去其舊弊。衆已獲安。嚴立新規。人知所措。臣恪居官次。不獲拜舞闕庭。無任抃躍屏營之至。

謝分司表

臣某言。伏奉今月十九日制書。授臣太子賓客。分司東都者。寵命自天。戰越無地。臣發迹書生。以文爲業。出身入仕。四十餘年。頃自集賢學士。出守吳郡。面辭之日。親承德音。念百姓水潦之餘。示微臣政理之法。臣祇膺聖旨。夙夜竭誠。閭里獲安。流庸盡復。猥蒙朝獎。錫以金章。及遷同州。又遇歉旱。悉心綏撫。幸免流離。今荷天慈。憫臣耆舊。列名賓護之職。分局河洛之都。老馬需束帛之恩。枯株蒙雨露之澤。獲居榮秩。以畢餘年。顧此微軀。實爲厚幸。伏以臣始爲御史。逮事德宗。今忝宮寮。幸逢聖日。舉四海之內。賢能則多。求六朝之臣。零落將盡。雖迫桑榆之景。猶傾葵藿之心。臣無任感恩惕抃之至。

劉賓客文集卷十七

狀

爲淮南杜相公論新羅請廣利方狀

淮南節度觀察處置等使敕賜貞元廣利方五卷。右臣得新羅賀正使朴一作如言狀稱。請前件方一部。將歸本國者。狀以纂集神效。出自聖衷。藥必易求。疾無隱狀。搜方伎之祕要。極生靈之天瘥。坐此華胥。咸躋仁壽。遂令絕域。迭聽風聲。美茲置功。爰有誠請。臣以其久稱藩附。素混車書。航海獻琛。既已通於華禮。釋痾蠲癘。豈獨隔於外區。正當四海爲家。冀觀十全之效。臣卽欲寫付。未敢自專。謹錄奏聞。

爲京兆韋尹降誕日進衣狀

衣一副四事。黃折造衫一領。白吳綾汗衫一領。白花羅半臂一領。白花羅袴一腰。右伏以正陽今月。誕聖嘉辰。連協千年。慶流萬國。凡在臣子。合有獻陳。敢傾就日之心。願奉如山之壽。輕瀆宸扆。無任兢惶。

爲京兆李尹降誕日進衣狀

衣一副四事。右伏以水德方清。真龍下降。天長地久。瞻北極以常尊。獻壽稱觴。配南山而永固。臣地居一作叨宗屬。職忝尹京。慶賀之誠。倍萬常品。前件衣服。謹詣銀臺門奉進。輕瀆旒扆。伏用兢惶。貞元十九年。四月十九日。

爲京兆章尹進野豬狀

右伏以收穫之餘。田獵有獲。異於芻豢。著在方書。旣堪充庖。輒敢上獻。前件野豬。謹隨狀進。謹奏。

爲杜相公自淮南追入長安至長樂驛謝賜酒食狀

具官臣某。右臣今日至長樂驛。高品某奉宣聖旨。賜臣酒食者。伏以恩降王人。榮分御膳。未展儀於雙闕。先受賜於八珍。品越脈膳。味兼醪醴。頓驚凡口。倍益歡心。無任欣躍。

爲杜相公謝就宅賜食狀

具官臣某。右高品某奉宣聖旨。賜臣食者。出自太官。飫於私第。光榮曲被。猥承推食之恩。驚蹇未施。益重素餐之責。舉其匕筯。若負邱山。無任戰荷踴躍之至。

爲東都章留守謝賜食狀

具官臣某。右臣今日發至長樂驛。中使某奉宣聖旨。賜臣食者。伏以味兼海陸。品溢圓方。降自御廚。光臨傳舍。臣初辭魏闕。倍懷犬馬之誠。猥受珍羞。更切稻粱之感。無任欣躍。

爲裴相公進東封圖狀

集賢殿御書院開元東封圖一面。右臣謹按開元十三年。玄宗皇帝以天下太平。登封東岳。聲明文物。振耀古今。伏惟陛下。丕承耿光。再闡鴻業。祖宗盛事。紹復有期。臣所以寫成此圖。輒敢上獻。至於續畫。躬自指揮。徵史氏之文。纂禮容之要。山川氣象。悉擬真形。羽衛威儀。咸稽故實。所冀叡情一覽。遐想玄蹤。臣叨

榮過深抱疾已久望陛下告成之日心必前知嗟老臣將謝之年身恐不見疲羸之際感激倍深前件圖
謹差某官某謹詣光順門奉進謹奏

舉崔監察羣自代狀

御史臺宣歙池等州都團練判官監察御史裏行崔羣右臣蒙恩授監察御史伏準建中元年正月五日
制常參官上後三日舉一人自代者伏以前件官在諸生中號爲國器繫維外府人咸惜之臣旣深知敢
舉自代貞元十九年閏十月日

舉開州柳使君公綽自代狀

尙書屯田某官等守開州刺史柳公綽右臣蒙恩授尙書屯田員外郎伏準建中元年正月五日制常參
官上後三日舉一人自代者伏以前件官以賢良方正再敷王庭在流輩間號爲端士昨除遠郡人皆惜
之臣初蒙授官得以論薦多士之內非無其人竊惟用材宜自遠始謹具如前謹錄奏聞伏聽敕旨貞元
二十一年四月八日

舉姜補闕倫自代狀

東都尙書省前左補闕姜倫右臣蒙恩授尙書主客郎中分司東都伏準建中元年正月五日敕常參官
上後三日舉一人自代者臣伏詳詔旨欲達聰旁求發揚幽遠故人得言所知不當循其階次也臣伏
以前件官有儒學士行蒙以諫官徵會其年老被疾不堪上道有司按視如狀不復逼迫至今家居而篤

志無倦。臣謹舉爲郎吏。分司別都。冀優賢振滯。兩得其道。大和元年六月十四日。

蘇州舉韋中丞自代狀

蘇州狀上中書門下。諸道鹽鐵轉運。江淮留後。朝議郎。守太僕少卿。兼御史中丞。上柱國。賜紫金魚袋。韋應物。右臣蒙恩授蘇州刺史。伏準建中元年正月五日制。刺史上後。舉一人自代者。前件官歷掌劇務。皆有美名。執心不回。臨事能斷。今領職雖重。本官尙輕。伏以當州口賦。首出諸郡。況經災沴。切在撫綏。尙省無能。輒敢公舉。司權筦之利。誠藉時才。流豈弟之風。實惟邦本。非敢臆說。以塞詔書。今具聞奏。大和六年十二月九日。

蘇州上後謝宰相狀

朝議大夫。使持節。蘇州諸軍事。守蘇州刺史。上柱國。劉某。右某。今月六日。到州上訖。某山東一書生。潦倒疎闊。在少壯日。猶不逮人。況今衰遲。智力愈短。相公哀憐。不遇擢授名邦。實荷宏獎。慙非器使。伏以當州。繇大祿之後。物力蕭然。肌寒殞仆。相枕於野。誓當悉心條理。續具奏論。才術素空。憂勞方始。懼無聞問。忝負恩知。不任瞻望。懇進之至。

蘇州加章服謝宰相狀

右某。素乏吏才。謬居劇郡。以無庸之器。當難治之時。恭守詔條。勤求人瘼。伏以聖德柔遠。皇明燭幽。凡有上陳。皆可其奏。遂令管見。得及疲黎。自承雨露之恩。非有循良之政。猥蒙朝獎。特降命書。顧逢掖之腐儒。

被華章之貴服。有黷陟明之典。誠招彼己之譏。限以守官。不獲拜謝。瞻望榮感。心魂載馳。大和七年十二月日。

汝州上後謝宰相狀

朝議大夫使持節汝州諸軍事守汝州刺史兼御史中丞充本州防禦使上柱國賜紫金魚袋劉某右某自領吳郡仍歲天災上稟詔條下求人瘼地包藪澤俗尙剽輕悉心撫綏用法擒擿事繁才短常積憂虞忽蒙天恩稍移近郡家本榮上籍占洛陽病辭江干老見鄉樹榮感之至實倍常情印綬所拘不獲拜謝瞻望德宇精誠坐馳無任感戀之至

汝州舉裴大夫自代狀

正議大夫使持節杭州諸軍事守杭州刺史上柱國賜紫金魚袋裴宏泰右臣蒙恩授汝州刺史兼御史中丞充本州防禦使伏準建中元年正月五日敕諸州刺史上後舉一人自代者伏以前件官前爲九卿出領兩鎮頃因微累遂有左遷今授遠州物情未塞臣前任鄰接具知公才舊屈未伸輒舉自代云云

汝州進應狀

汝州防禦使當使進奉籠母鷹六聯右伏以前件鷹等學習應期馴養斯至列於常貢有異衆禽受繼之時志已存於雲外下韞之際思用展於軍前旣懷百中之能願獻三驅之禮謹差防禦押衙景再休隨狀奉進以聞大和九年九月十一日

同州舉蕭諫議自代狀

同州防禦使前諫議大夫蕭俶。右臣蒙恩授同州刺史兼御史中丞。充本州防禦長春宮等使。伏準貞元二年正月二十四日敕。上後三日。舉一人自代者。伏以前件官。生於貴族。伏膺儒門。搢紳之間。號爲端士。昨蒙朝獎。冠於諫垣。時方被病。不果上道。長告已滿。塊然家居。今聞疾瘳。可以錄用。臣與俶久同班列。知其材能。爲官擇人。敢舉自代。大和元年十二月四日。

上宰相賀德音狀

同州狀上中書門下。今月十六日德音。右被刑部牒宣示德音。伏以聖澤滋深。新恩廣被。言念正刑之外。或有誑誤之徒。爰降殊私。特宏在宥。瑕累咸滌。危疑獲安。此皆廟算弼諧。致君及物。事光前史。功格上玄。某限以守官。不獲隨例拜賀。無任抃躍之至。大和九年十二月二十三日。

上宰相賀改元赦書狀

同州狀上中書門下。改元赦書。右伏奉今月一日制書。改大和十年爲開成元年。大赦天下者。伏以律首三元。禮崇四始。順陽和發生之德。敷大號渙汗之恩。宥過恤刑。弛征已責。盡去人瘼。通知物情。德音朝發於九天。和氣夕周於四海。此皆相公弼諧之道。變贊之功。進熟於密勿之間。發揚成滂沛之澤。某恪守官業。印綬所拘。不獲隨例拜賀。

薦處士嚴恣狀

處士嚴惑。右左庶子損之之孫。國子司業士元之子。舊名保嗣。亦有官班。頃者李賓客渤常與之遊。辟爲桂州支使。其後寄家汝海。專靜自居。某嘗典汝州。與語甚熟。歷代史及國朝故事。悉能該通。操心甚危。觀跡相副。未逢知己。已過壯年。汨沒風塵。有足悲者。伏見赦文節目。委州郡長吏搜訪隱淪。夫舉薦無它。唯善所在。每覽珠一作英卷後列學士姓名。有常州人符鳳。白衣在選。馭其藝業。不棄遠人。某忝被儒官。得以薦士。亦非出位。冀不廢言。儻宏文集賢史氏之館。採其實學。有勸諸生。伏以桂州辟之於前。某薦之於後。豈必有士長吏。然後事行。伏惟試味斯言。降意詳擇。謹狀。

薦處士王龜狀

處士王龜。古者選公族大夫。必以惇惠者教之。文敏者道之。果敢者諗之。鎮靜者循之。孜孜於此者。蓋膏粱之性難正。而懼公侯之胤不能嗣其耿光。可以深惜。然則成宣之後。而老爲大夫。非恥乎。此智武子誠文子旣冠而見之詞也。是知古之取士。不專寒族。必參用世胄。以廣得人之路。今見處士王龜。卽居守之第三子也。天性貞靜。操心甚危。不由門資。誓志自立。樂處士之號。不汨綺襦之間。自到洛都。便居山寺。耽玩墳籍。放情煙霞。曾邀與語。如鋸木屑。信有稟受。居然出羣。以比在京師。甚足知者。諫院有狀。名流函言。某流滯周南。靜閱時輩。身雖不用。心甚愛才。況遇相公持衡。敢有所啓。誠懸之下。輕重難欺。伏惟深賜詳擇。知卿族之內有遺逸焉。謹狀。正議大夫。檢校禮部尙書。兼太子賓客。分司東都劉某狀。

劉賓客文集卷十八

啓

上杜司徒啓 時謫朗州

某啓。一自謫居。七悲秋氣。越聲長苦。聽者誰哀。湯網雖疎。久而猶註。失意多病。衰不待年。心如寒灰。頭有白髮。惕厲之日。利於退藏。是以彌年。不敢奏記。近本州徐使君至。奉手筆一函。稱謂不移。問訊加劇。重復點竄。一無客言。忽疑此身。猶在門下。收紙長想。欣然感生。尋省遭罹。萬重不幸。方寸之地。自不能言。求人見諒。豈復容易。伏蒙遠示。且曰浮謗漸消。況承慶宥。期以振刷。方今聖賢合德。朝野多歡。澤柔異類。仁及行葦。萬族咸說。獨爲窮人。四時平分。未變寒谷。自同類牽復。又已三年。側聞衆情。或似哀歎。某材略無取。廢錮是宜。若非舊恩。孰肯留念。六翻方鍛。思重託於扶搖。孤桐半焦。冀見收於煨燼。伏紙流涕。不知所言。謹啓。

上淮南李相公啓

某啓。某向以昧於周身。措足危地。駭機一發。浮謗如川。巧言奇中。別白無路。祝網之日。漏恩者三。咋舌兢魂。分終裔壤。豈意天未剿絕。仁人登庸。施一陽於剝極之際。援衆溺於坎深之下。南箕播物。不勝昌言。危心鍛翻。繇是自保。陰施之德已然。乃聞受恩同人。盟以死答。私感竊抃。積於窮年。化權禮絕。孤志莫展。今

幸伍中牽復。司存字下。伏慮因是記其姓名。謹獻詩二篇。敢聞左右。古之所以導下情而通比興者。必文其言以表之。雖毗謠俚音。可儷風什。伏惟降意詳擇。斯大幸也。謹因楊子程留後行。謹奉啓。不宣。謹啓。

上門下武相公啓

某啓。去年本州吏人自蜀還。伏奉示問。兼衣服繒綵等。雲水路遙。絨縻賙厚。恭承惠下之旨。重以念舊之懷。熙如陽和。列在細簡。苦心多感。危涕自零。驚神驛思。若侍穎杖。伏以聖上注意理本。銳求國楨。念外臺報政之功。追宣室前席之事。重下丹詔。再升黃樞。羣情合符。和氣來應。八柄所在。三人同心。協台坐之精。膺傑材之數。談笑於規隨之際。從容於陶冶之間。物皆由儀。人識所措。某久罹憲網。兀若枯株。當萬類咸說之辰。抱窮途終慟之苦。清朝無絳灌之列。至理絕椒蘭之嫌。此時不遇。可以言命。嗟乎。一身主祀。萬里望粉榆之鄉。高堂有親。九年居蠻貊之地。從坐之典。固有等差。同類之中。又尋牽復。頃在臺日。獲奉準繩。指吏途於按讞。遵文律於章奏。藻鑿之下。難逃陋容。炎涼載移。足見真態。自違間左右。沈淪遐荒。歲月滋深。艱貞彌厲。緬想受譴之始。它人不知。屬山園事繁。孱懦力竭。本使有內嬖之吏。供司有恃寵之臣。言涉猜嫌。動礙關束。城社之勢。函矢紛然。彌縫其間。崎嶇備盡。始慮罪因事闕。甯虞謗逐。跡生智乏。周身又誰咎也。伏以趙國公頃承一顧之重。高邑公夙荷見知之深。雖提挈不忘。而顯白無自。蓋以永貞之際。皆在外方。雖得傳聞。莫詳本末。特哀黨錮。亟形話言。自前歲振淹。命行中止。或聞與論。亦愍重傷。伏遇相公秉鈞。輒已自賀。儻重言一發。清議攸同。使聖朝無錮人。大治無廢物。自新之路。旣廣。好生之德。遠彰。羣

蟄應南山之雷。窮鱗得西江之水。指顧之內。生成可期。伏惟發膚寸之陰。成彌天之澤。回一瞬之念。致再造之恩。誠無補於多事之時。庶有助於陰施之德。無任懇悃之至。謹啓。

上中書李相公啓

某啓。去年國子主簿楊歸厚致書相慶。伏承相公言及廢錮。愍色甚深。哀仲翔之久謫。恕元直之方寸。思振淹之道。廣錫類之仁。遠聆一言。如受華袞。伏自不窺牆仞。九年於茲。高卑邈殊。禮數懸絕。雖身居廢地。而心恃至公。伏以相公久以訏謨。參於宥密。材既爲時而出。道以得君而亨。令於發流水之源。化行猶偃草之易。習強伉者。自納於軌。物困杵軸者。咸躋於仁壽。六轡在手。平衡居心。運思於陶冶之間。宣猷於魚水之際。然能軫念廢物。遠哀窮途。嗟哉小生。有足悲者。內無手足之助。外乏強近之親。爲學苦心。本求榮養。得罪由己。翻乃貽憂。捫躬自劾。愧入肌骨。禍起飛語。刑極淪胥。心因病怯。氣以愁耗。近者否運將泰。仁人持衡。伏惟推曾閔之懷。憐烏鳥之志。處夔龍之位。傷屈賈之心。沛然垂光。昭振幽墊。言出口吻。澤濡寰區。昔者行葦勿傷。枯骼猶掩。哀老以出幣。愍窮而開懷。無情異類。尙或嬰慮。顧惟江干逐客。曾是相府故人。言念材能。誠無所取。譬諸飛走。庸或知恩。嗚呼。以不駐之光陰。抱無涯之憂悔。當可封之至理。爲永廢之窮人。聞弦尙驚。危心不定。垂耳斯久。長鳴孔悲。腸回淚盡。言不宣意。謹啓。

謝門下武相公啓

某啓。某一坐飛語。廢錮十年。昨蒙徵還。重罹不幸。詔命始下。周章失圖。吞聲咋舌。顯白無路。豈謂烏鳥微

志惻於深仁。恤然動拯溺之懷。煦然存道舊之旨。言念穀觶。慰安蒼黃。推以恕心。期於造膝。重言一發。叡聽克從。回陽曜於肅殺之辰。沃天波於踰躐之際。俾移善地。獲奉安輿。率土知孝治之源。羣生識人倫之厚。感召和氣。發揚皇風。豈惟匹夫獨受其賜。某卽以今月十一日到州。上訖守。在要荒。拘於印綬。巾幘詣謝。有志莫從。誠知微生不足酬德。捐軀之外。無地寄言。效節蕭蕭一作蕭蕭。屏虔然心禱。無任懇悃。屏營之至。謹勒軍事衙官。左威衛。慈州吉昌府別將。員外置同正員。常懇奉啓起居。不宣。謹啓。

謝中書張相公啓

某啓。某智乏周身。動必招侮。一坐飛語。如衝駭機。昨者詔書始下。驚懼失次。叫闈無路。擠壑是虞。草木賤軀。誠不足惜。烏鳥微志。實有可哀。伏蒙聖慈。遽寢前命。移莅善部。載形綸言。凡在人臣。皆感至德。凡爲人子。同荷至仁。豈唯鰥生。獨受其賜。伏以相公心符上德。道冠如仁。一夫不獲。咸見於色。密旨未下。歎形於言。竟回三舍之光。能拔九泉之厄。袁公之平楚獄。不忍錮人。晏子之哀越石。乃伸知己。所以慶垂胤祚。言成春秋。神理孔昭。報應斯必。身伴蟬翼。何以受恩。死輕鴻毛。固得其所。卑守有限。拜謝未由。無任感激。兢惶之至。謹勒軍事衙官。守左威衛。慈州吉昌府別將。員外置同正員。常懇奉啓起居。不宣。謹啓。

賀門下裴相公啓

某啓。伏以相公含道傑出。降神挺生。坐籌以弼叡謨。秉鉞以行大討。風雲助氣。川岳效靈。制勝於尊俎之間。指蹤於韞縠之末。蕭斧既定。袞衣以歸。君心如魚水。人望如風草。一德交暢。萬邦和平。運神思於洪鑪。

納生靈於壽域。文武丕績。冠於古今。某恪守遐荒。不獲隨例拜賀。

上門下裴相公啓

某啓。曩者淮右逋誅。卽戎歲久。天子齋戒。以命元臣。登壇之日。上略前定。從九天而下。縱以神兵。分六符之光。歸其長彗。授鉞於西顧之半。策勳於北陸之初。功成偃節。復執大柄。君臣相遇。播於樂章。山河啓封。載在盟府。上方注意。人益具瞻。因魚水之協符。極夔龍之事業。時屬四時。恩覃萬方。致君及物。其德兩大。古先峻賢所未備者。我從容而保之。殆非人事。抑有幽贊。夫異同之論。我以獨見。剖之文武之道。我以全材。統之崇高之位。我以大功。居之造物之權。我以虛心。運之然持盈之術。古所難也。實在陰施及物。厚其德基。以左右庸庸。而百祿是荷。人所欽戴。久而愈宜。昔袁太尉不忍錮人。而楚獄衰息。一言之慶。子孫丕承。以今日將明之材。行前修博施之義。筆端膚寸。澤及九垓。猶夫疾耕。必有滯穗。某頃墮危厄。嘗受厚恩。詛盟於心。要之自效。常懼廢死。荒服永辜。願言敢因賀踐。一寄丹懇。顧非奇理。不足以縈於冲襟。然則利於行者。固在乎常談。而卓詭孤特之言。未必利於行也。伏惟以愚言與賢者參之。謹啓。

賀門下李相公啓

自四川入爲大夫拜相

某啓。伏以聖君當功成愷樂之日。而求賢愈切。思治益深。是上玄垂休。欲速致太平之明效。以相公事業。而逢此時。天下之人。視仁壽之域。其猶尋尺。故命書所至。德風隨之。微材片善。咸自磨拂。況同主國柄。如吹墮簾。含生之倫。唯所措置。日月亭午。物無邪陰。聖賢合德。人識正道。雖居畎畝。足以詠歌。某遐守要荒。

不獲隨例拜賀。私感竊抃。實倍恆情。

上僕射李相公啓

某啓。州吏還伏蒙擺落常態。手筆具書。言及貞元中登朝人。逮今無十輩。及發中書相公一函。具道閣下。亟言曩遊。顏間頗有衰色。夫溝中之木。與犧象同體。追琢不至。生成枯薪。朱而藍之。猶足爲器。苟液構曲。戾不足枉斧斤。願爲庭燎。以照嘉客。謹啓。

謝裴相公啓

某啓。某遭不幸。歲將二紀。雖累更符竹。而未出網羅。親知見憐。或有論薦。如陷還潭。動而愈沈。甘心終否。無路自奮。豈意天未剿絕。仁人持衡。紆神慮於多方。起堙淪於久廢。居剝極之際。一陽復生。出坎深之中。平路資始。通籍郎位。分曹樂都。喬木展舊國之思。行雲有故山之戀。姻族相賀。壺觴盈門。官無責詞。始自今日。禽魚之志。誓以死生。草木之年。惜其晼晚。章程有守。拜謝無由。瞻望巖廊。虔然心禱。謹啓。

謝竇相公啓

某啓。某一辭朝列二十三年。雖轉郡符。未離謫籍。卑溼生疾。衰遲鮮歡。望故國而未歸。如痿人之念起。昨蒙罷免。甘守邱園。相公不棄舊遊。特哀久廢。每奉華翰。賜之衷言。果蒙新恩。重忝清貫。薦延有漸。拯拔多方。六律變幽谷之寒。一丸銷彌年之疹。鍛翮將舉。危心獲安。布武夷途。自此而始。分曹有繫。拜謝無由。瞻望德藩。坐馳精爽。無任感激之至。謹啓。

劉賓客文集卷十九

集紀

唐故相國李公集紀

天以正氣付偉人。必飾之使光耀於世。粹和綱縉積於中。鏗鏘發越形乎文。一作文之細大。視道之行止。故得其位者。文非空言。咸繫於訏謨。宥密庸可不紀。惟唐以神武定天下。羣慝既讐。驟示以文。韶英之音。與鉦鼓相襲。故起文章爲大臣者。魏文貞以諫諍顯。馬高唐以智略奮。岑江陵以潤色聞。無草昧汗馬之勞。而任遇在功臣上。唐之貴文至矣哉。後王纂承。多以國柄付文士。元和初。憲宗遵聖祖故事。視有宰相器者。貯之內庭。繇是釋筆硯而操化權者十八九。公實得時而光焉。公諱絳。字深之。趙郡人。在貢士中傑然有奇表。既登太常第。又以詞賦陞甲科。授祕書省校書郎。歲滿從調。有司設甲乙問以觀決斷。復居高品。補渭南尉。擢拜監察御史。未幾以本官充翰林學士。居中轉尙書主客員外郎。歷司勳郎中。知制誥。遷中書舍人。風儀峻整。敷奏諳切。言事感動。上輒目送之。一旦召至浴堂門。與語半日。曰。將移用於大位。宜稔熟民聽。遂出爲戶部侍郎。遷中書侍郎。同平章事。毅然有直聲。及册免而問望益大。周旋公卿間。五爲尙書。歷御史大夫。左僕射。一以三公領太常。刺近輔。居保釐。登齋壇。皆再焉。大和三年。以司空鎮南鄭。居二歲。坐氣剛玉折。海內冤惜之。後三年。嗣子前京兆府尹曹掾璆。次子前監察御史裏行頊等。泣持遺草。

請編之。肇自從試有司。至於宰天下。詞賦詔誥。封章啓事。謔詩贈餞。金石麗功。凡四百餘篇。勒成二十卷。上所以知君臣啓沃之際。下所以備風雅詩聲之義。洪鐘駭聽。瑤瑟清骨。其在翰苑及登台庭。極言大事。誠貫理直。感通神祇。龍鱗收怒。天日回照。古所謂一言興邦者。信哉。始愚與公爲布衣游。及仕畿服。幸公同邑。其後雖翔泳勢異。而不以名數革初心。今考其文。至論事疏。感人肺肝。毛髮皆聳。嗚呼。其盛唐之遺直歟。

唐故中書侍郎平章事韋公集紀

漢庭以賢良文學徵有道之士。公孫宏條對第一。席其勢。鼓行人間。取丞相且侯。使漢有得人之聲。伊宏發也。皇唐文物。與漢同風。故天后朝。燕國張公說。以詞標文苑。徵玄宗朝。曲江張公九齡。以道侔伊呂。徵德宗朝。天水姜公公輔。杜陵韋公執誼。河東裴公均。以賢良方正徵。憲宗朝。河南元公稹。京兆韋公淳。以才識兼茂徵。隴西牛公僧孺。李公宗閔。以能直言極諫徵。咸用對策。甲於天下。繼爲有聲宰相。古今相望。落落然如騎星辰。與夫起版築飯牛者異矣。公本名淳。舉進士。登賢良。旣仕。方更名處厚。字德載。漢丞相扶陽侯之裔孫。後周逍遙公夔之八代孫。江陵節度參謀。監察御史裏行。贈右僕射革^{一作}某。之元子。生而聰明絕人。在提孩。發言成詩。未幾能賦。受經於先君僕射。學文於伯舅許公孟容。及壯。通六經。旁貫百氏。咨天人之際。遂探歷數。明天官。窮性命之源。以至於佛書。尤邃。初爲集賢殿校書郎。宰相李趙公監修國史。引直東觀。就政^{一作}改。咸陽尉。遷右拾遺。轉左補闕。世稱有史才。而能諫諍。入尚書爲郎。歷禮部考功。皆

人望所在。上方用威武以讐不庭。宿兵寢久。韋丞相貫之酌人情。上言不合。意册免。因歷詆所善。公在伍中。出爲開州刺史。居三年。執友崔敦詩爲相。徵拜戶部郎中。至闕下。旬歲間。以本官知制誥。穆宗新卽位。注意近臣。召入翰林。充侍講學士。初授諫議大夫。續換中書舍人。侍游蓬萊池。延問大義。退而進六經法言二十篇。優詔答之。賜以金紫。尋遷權知兵部侍郎。知制誥。翰林侍講。史館修撰。長慶四年春。敬宗踐阼。以公用經術。左右先帝五年。稔聞其德。尤所欽倚。內署故事。與外廷不同。凡言翰林學士。必草詔書。有侍講者。專備顧問。雖官爲中書舍人。或它官知制誥。第用其班次耳。不竄言於訓詞。至是。上器公。且有以寵之。乃使內謁者申命去侍講之稱。慮未諭於百執事。居數日。降命書重舉舊官。以明新意。尋真拜夏官貳卿。由是內庭詞臣無出其右者。凡密旨必承乎權輿。故號承旨學士。上富春秋。未親爲政。或有凝滯。視公如蒼龜。寶歷季年。宮壺間一夕生變。人情大駭。雖鼎臣無所關決。唯內署得參焉。羣議闕反。胡貢然俟公一言而定。戡難纘服。再維乾綱。今上繼明。策勳第一。擢拜中書侍郎。同中書門下平章事。以高材遇英主。功顯人伏。言無不從。筆端膚寸。澤及天下。盡罷冗食。請歸材人。事先有司。物止常貢。城社無託。巖廊益尊。感恩盡瘁。不啻神用。大和二年十二月。上前言事未及畢。詞疾作暴。債一作未及畢以廢服委地。同列白奏。搢笏扶持之不能起。上命中貴人左右翼負歸於中書。如大醉狀。上震驚咨嗟。徵醫賜藥。旁午疊委。會莫肩輿至第。詰旦以不起聞。贈榼加常禮。後十年。嗣子蕃以太子舍人直弘文館。編次遺文七十通。銜哀貢誠。乞詞以冠其首。謹按公未爲近臣已前。所著詞賦。讚論記述。銘志。皆文士之詞也。以才麗爲主。自入爲

學士至宰相以往。所執筆皆經綸制置。裁成潤色之詞也。以識度爲宗。觀其發德音。福生人。沛然如時雨。襲元老。論功臣。穆然如景風。命相之册。和而莊。命將之誥。昭而毅。薦賢能。其氣似孔文舉。論經學。其博似劉子駿。發十難以摧言利者。其辯似管夷吾。噫。逢時得君。奮智謀以取高位。而令名隨之。豈不偉哉。初。蕃旣纂。修父書。咨於先執李習之。請文爲領袖。許而未就。一旦習之憮然謂蕃曰。翺昔與韓吏部退之爲文章盟主。同時倫輩。惟柳儀曹宗元。劉賓客夢得耳。韓柳之逝久矣。今翺又被病。慮不能自述。有孤前言。齋恨無已。將子薦誠於劉君乎。無何。習之夢奠於襄州。蕃具道其語。余感相國之平昔。且嘉蕃之虔度孝敬。庶幾能世其家。故不讓云。

唐故相國贈司空令狐公集紀

起文章而陟大位。丹青景化。焜耀藩方。如非煙祥風。緣飾萬物。而與令名相終始者。有唐文臣令狐公實當之。公名楚。字殼士。燉煌人。今占數於長安右部。天授神敏。性能無師。始學語言。乃協宮徵。故五歲已爲詩成章。旣冠。參貢士。果有名字。時司空杜公以重德知貢舉。擢居甲科。琅邪王拱識公於童丱。雅器重之。至是拱自虞部正郎領桂州。銳於辟賢。以酬不次之遇。先拜章而後告公。旣而授試宏文館校書郎。公爲人子。重難遠行。稟命而去。居一歲。竟迫方寸而歸。家在并汾間。急於祿養。捧從事檄於并州。凡更三牧。官至監察御史。元和初。憲宗聞其名。徵拜右拾遺。歷太常博士。入尚書爲禮部員外郎。性至孝。旣孤。以善居喪。聞中月除刑部員外。時帝女下嫁。相禮闕官。公以本官攝博士。當問名之夕。上親臨帳幄。簾內以窺之。

禮容甚偉。聲氣朗徹。上目送良久。謂左右曰。是官可用。記其姓名。未幾改職。方知制誥。詞鋒犀利。絕人遠甚。適有旨。選司言高第者視草。內庭宰臣以公爲首。遂轉本司郎中。充翰林學士。滿歲遷中書舍人。專掌內制。武帳通奏。柏梁陪燕。嘉猷高韻。冠於一時。會淮右稽誅。上遣丞相卽戎。以督戰。公草詔書。詞有涉嫌者。相府上言。有命中書參詳竄定。因罷內職歸閣中。而君心眷然。將有大用。且出入以試之。乃牧華州。兼御史中丞。錫以金紫。居鎮七月。遷大夫。充河陽三城懷州節度使。又七月。急召抵京師。拜中書侍郎。同中書門下平章事。天下然後知上心倚以爲相。非一朝也。是歲元和十四年秋。明年正月。憲宗晏駕。惜其在位日淺。遭時大變。穆宗踐阼。轉門下侍郎平章事。萬幾百度。別有所付。第以舊相署位。充山陵使。七月。禮畢。部下吏有以贓狀聞者。朝典用責率之義。是以左授宣歙池等州都團練觀察處置使。兼御史大夫。恩顧一異。媒孽隨生。旋又貶衡州刺史。移郢州。轉太子賓客分司東都。尋起爲陝虢觀察使。或有上封者。稱前以奉陵寢不檢。下獲譴。今陵土猶溼。未宜遽用。次陝一日。重爲賓客分司。長慶四年。改河南尹。其秋。授檢校禮部尚書。兼汴州刺史。充宣武軍節度管內觀察處置等使。汴州爲四戰之地。擇帥先有功。峻刑。右武。疑似沈命。號爲危邦者。積年。公始以清儉自律。以恩信待人。以夷坦去羣疑。以禮讓汰慘急。自上化下。速於置郵。泮林革音。無復故態。蠶書勞之。就加大司馬。文宗纂服。三年冬。上表。以大臣未識天子。願朝正。月制曰。可。操節入覲。遷戶部尚書。俄爲東都留守。又轉檢校尚書右僕射。兼鄆州刺史。天平軍節度使。後以王業之始。實爲北京。移鎮太原。從人望也。以吏部尚書徵。續換太常卿。真拜尚書左僕射。大和九年冬。

十一月京師有急兵起。上方御正殿。即日還宮。是夕召公決事禁中。以見賢偏反。事傳一作傳。古義爲對。其詞
謙切。無所顧望。上心嘉之。居一二日。守本官兼諸道鹽鐵轉運使。以幹利權。既非素尚。佗佗牢讓。故復爲
檢校左僕射。興元尹。山南西道節度觀察使。兼御史大夫。開成二年十一月十二日。薨於漢中官舍。享年
七十。齋終之前一日。自修遺表。初述感恩陳力之大義。中及朝廷刑政之或闕。意切言盡。神識不昏。上深
悼之。形於愍冊。未登三事。故以贈之。歸全之夕。有大星隕於正寢之上。光燭於庭。天意若曰。既稟之而生。
亦有涯而落。其文章貴壽之氣。焰歟。初憲宗覽國書。見五王復辟之際。狄梁公實尸之。公爲台臣。獨召使
殿問曰。仁傑有後乎。公以其支孫試校書郎兼蕃爲對。即日拜左拾遺。公遂草制。它日相銜者。因挾其詞。
以爲非春秋諱魯之旨。穆宗新卽位。謙讓不自決。遂有衡州之貶。公議冤之。嗟乎。天之於賦予也。甚嗇而
難周。公獨富文章。丁良時。歷名卿。至元老。蓋忠廉孝友。愛才與物。合是粹美。以將之邪。可謂全德矣。既免
喪。嗣子左補闕絢。集公之文。成一百三十卷。因長子太子左諭德宏分司東都。負其簡來謁。泣曰。先正一作
贈司空與丈人爲顯交。撤懸之前五日。所賦詩寄友。非他人也。今手澤尙存。言之嗚咽。長號。予亦爲之慟。
收淚而視。分當編次之始。公參大鹵記室。以文雄於邊。議者謂一方不足以聘用。徵拜於朝。累遷儀曹郎。
乃登西掖。入內署。訐謨密勿。遂委魁柄。斯以文雄於國也。嗚呼。咫尺之管。文敏者執而運之。所如皆合。在
藩聳萬夫之觀望。立朝賁羣寮之頰舌。居內成大政之風靈。導馭澮於章奏。鼓洪瀾於訓誥。筆端膚寸。膏
潤天下。文章之用。極其至矣。而又餘力工於篇什古文。士所難兼焉。昔王珣爲晉僕射。夢人授大筆如椽。

覺而謂人曰。此必有大手筆事。後孝武哀册文。乃珣之詞也。公爲宰相。奉詔撰憲宗聖神章武孝皇帝哀册文。時稱乾陵崔文公之比。今考之而信。故以爲首冠。尊重事也。其它各以類聚著於篇。

唐故尚書主客員外郎盧公集紀

心之精微發而爲文。文之神妙詠而爲詩。猶夫孤桐朗玉。自有天律。能事具者。其名必高。名由實生。故久而益大。尚書郎盧公諱象。字緯卿。始以章句振起於開元中。與王維崔顥比肩驥首。鼓行於時。妍詞一發。樂府傳貴。由前進士補祕書省校書郎。轉右衛倉曹掾。丞相曲江公方執文衡。揣摩後進。得公深器之。擢爲左補闕。河南府司錄司勳員外郎。名盛氣高。少所卑下。爲飛語所中。左遷齊汾鄭三郡司馬。入爲膳部員外郎。時大盜起幽陵。入洛師。東夏衣冠。不克歸。王所爲虜劫。執公墮脇。從伍中。初謫果州長史。又貶永州司戶。移吉州長史。天下無事。朝廷思用宿舊。徵拜主客員外郎。道病留武昌。遂不起。故相崔太傅時爲右史。方在鄂。以文誌其墓。其詞曰。噫。公妙年有聲。振耀當代。翱翔雲路。不虞則層反。繳盛名先物。易生羸疵。三至郎署。坐成遺蓋。踰蹬江皋。棲棲沒齒。見知者恨之。公遠祖元魏。北齊後周。皆爲帝師。公之叔父嵩。山逸人。諫議大夫。顯然。真隱者也。公下世後七十三年。其孫元符。捧遺草來。乞詞以表之。嘗經亂離。多所散落。今之存者。十有二卷。凡若干篇。

唐故衡州刺史呂君集紀

五行秀氣。得之居多者。爲俊人。其色激灑於顏間。其聲發而爲文章。天之所與。有物來相。彼由學而致者。

如工人染夏。以視羽畎。有生死之殊矣。初貞元中。天子之文章。煥乎垂光。慶霄在上。萬物五色。天下文人。爲氣所召。其生乃蕃。靈芝萋莆。與百果齊坼。然煌煌翹翹。出乎其類。終爲偉人者。幾希矣。東平呂和叔實生是時。而絕人遠甚。始以文學震三川。三川守以爲貢士之冠。名聲四馳。速如羽檄。長安中。諸生咸避其鋒。兩科連中。芒刃愈出。德宗聞其名。自集賢殿校書郎擢爲左拾遺。明年。犬戎請和。上問能使絕域者。君以奇表。有專對材。膺選。轉殿內史。錫之銀章。還拜尚書戶部員外郎。轉司封。遷刑部郎中。兼侍御史。副治書之職。會中執法左遷。緣坐道州刺史。以政聞。改衡州。年四十而沒。後十年。其子安衡泣捧遺草來謁。咨余紀一作敘之。成一家言。凡二百篇。和叔名溫。別字化光。祖考皆以文學至大官。蚤聞詩禮於先侍郎。又師吳郡陸贄。通春秋。從梁肅學文章。勇於藝能。咸有所祖。年益壯。志益大。遂撥去文學。與雋賢交。重氣槩。覈名實。欬然以致君及物爲大欲。每與其徒講疑考要。王霸富彊之術。臣子忠孝之道。出入上下百千年間。詆訶角逐。疊發連注。得一善輒盱衡擊節。揚袂頓足。信容得色。舞於眉端。以爲按是言。循是理。合乎心而氣將之。昭昭乎若揭日月而行。孰能闕其勢而爭夫光者乎。烏呼。言可信而時異。道甚長而命窄。精氣爲物。其有所歸乎。古之爲書者。先立言而後體物。賈生之書。首過秦。而荀卿亦後其賦。和叔年少遇君。而卒以誦似賈生。能明王道。似荀卿。故余所先後視二書。斷自人文化成論。至諸葛武侯廟記爲上篇。其它咸有爲而爲之。始學左氏書。故其文微爲富豔。夫羿之關弓。唯巴蛇九日。乃能盡其轂。而回注鷄爵。亦要失中於尋常之間。非羿之手。弓有能有不能。所遇然也。後之達解者。推而廣之。知余之素文。不相索於文字。

之內而已。

唐故尚書禮部員外郎柳君集紀

八音與政通。而文章與時高。下三代之文。至戰國而病。涉秦漢復起。漢之文。至列國而病。唐興復起。夫政龐而土裂。三光五嶽之氣分。扶問反大音不完。故必混一。而後大振。初貞元中。上方嚮文章。昭回之光。下飾萬物。天下文士。爭執所長。與時而奮。粲焉如繁星麗天。而芒寒色正。人望而敬者。五行而已。河東柳子厚。斯人望而敬者歟。子厚始以童子有奇名於貞元初。至九年爲名進士。十有九年爲材御史。二十有一年。以文章稱首。入尚書爲禮部員外郎。是歲以疎雋少檢獲。出牧邵州。又謫佐永州。居十年。詔書徵不用。遂爲柳州刺史。五歲不得召。病且革。留書抵其友中山劉某曰。我不幸卒。以謫死。以遺草累故人。某執書以泣。遂編次爲三十通行於世。子厚之喪。昌黎韓退之誌其墓。且以書來弔曰。哀哉。若人之不淑。吾嘗評其文。雄深雅健。似司馬子長。崔蔡不足多也。安定皇甫湜於文章少所推讓。亦以退之之言爲然。凡子厚名氏與仕與年。暨行已之大方。有退之之誌。若祭文在。今附於第一通之末云。

董氏武陵集紀

片言可以明百意。坐馳可以役萬景。工於詩者能之。風雅體變而興同。古今調殊而理具。達於詩者能之。工生於才。達生於明。二者還相爲用。而後詩道備矣。余嘗執斯評爲公是。且衡而度之。誠懸平心。默揣羣才。鈞銖尋尺。隨限而盡。如是所閱者百態。一旦得董生之詞。杳如搏翠屏。浮層瀾。視聽所遇。非風塵間物。

亦猶明金絳羽。得於遐裔。雖欲勿寶可乎。生乎挺字庶中。幼嗜屬詩。晚而不衰。心原爲鑪。筆端爲炭。鍛鍊元本。雕鑿羣形。糺紛舛錯。逐意奔走。因故沿濁。協爲新聲。嘗所與游者。皆青雲之士。聞名如盧杜盧員外象杜員甫。高韻如包李包祭酒佶李侍郎紆。迭以章句揚於當時。末路寡徒。值余歡甚。因相謂曰。間者以廷尉屬爲荊州從事。移疾罷去。幽臥於武陵。迨今四年。言未信於世。道不施於人。寓其性懷。播爲吟詠。時復發笥。紛然盈前。凡五十篇。因地爲目。吾子常號知我。盍表而志之。爲生羽翼。余不得讓而著於篇。因系之曰。詩者其文章之蘊邪。義得而言喪。故微而難能。境生於象外。故精而寡和。千里之繆。不容秋毫。非有的然之姿。可使戶曉。必俟知者。然後鼓行於時。自建安距永明已還。詞人比肩。唱和相發。有以朔風零雨。高視天下。蟬噪鳥鳴。蔚在史策。國朝因之。粲然復興。由篇章以躋貴仕者。相踵而起。兵興已還。右武尙功。公卿大夫。以憂濟爲任。不暇器人於文什之間。故其風寢息。樂府協律不能足。去聲新詞一作音以度曲。夜諷之職。寂寥無紀。則董生之貧臥於裔土也。其不得於時者歟。其不試故藝者歟。

澈上人文集紀

釋子工爲詩尙矣。休上人賦別怨約法師哭范尙書。咸爲當時才士之所傾歎。厥後比比有之。上人生於會稽。本湯氏子。聰察嗜學。不肯爲凡夫。因辭父兄出家。號靈澈。字源澄。雖受經論。一心好篇章。從越客嚴維學爲詩。遂籍籍有聞。去聲維卒乃抵吳興。與長老詩僧皎然游。講藝益至。皎然以書薦於詞人包侍郎佶。包得之大喜。又以書致於李侍郎紆。是時以文章風韻主盟於世者曰包李。以是上人之名。由二公而颺。

如雲得風，柯葉張王。以文章接才子，以禪理說高人。風儀甚雅，談笑多味。貞元中，西遊京師，名振輦下。緇流疾之，造飛語激動中貴人，因侵誣得罪，徙汀州。會赦歸東越。時吳楚間諸侯多賓禮招延之。元和十一年，終於宣州開元寺。七十有一，門人遷之，建塔於越之山陰天柱峯之陲。從本教也。初，上人在吳興，居何山，與晝公爲侶。皎然字晝，時以字行。時予方以兩髦執筆視陪其吟詠，皆曰：「孺子可教。」後相遇於京洛，與支許之契焉。上人沒後十七年，予爲吳郡。其門人秀峯捧先師之文來乞詞以志，且曰：「師嘗在吳賦詩僅二千首，今刪取三百篇，勒爲十卷，自大歷至元和，凡五十年間，接詞客聞人，酬唱別爲十卷，今也。思行乎昭代，求一言羽翼之，因爲評曰：世之言詩僧多出江左，靈一導其源，護國襲之，清江揚其波，法振沿之，如幺弦孤韻，警人人耳，非大樂之音。獨吳興晝公能備衆體，晝公後澈公承之。至如芙蓉園新寺詩云：「經來白馬寺，僧到赤烏年。」謫汀州云：「青蠅爲弔客，黃耳寄家書。」可謂入作者闔域，豈獨雄於詩僧間邪？」

劉賓客文集卷二十

雜著

傷我馬詞

馬龍類。蓋健而善馳。君子之所宜求爲畧也。故法求於力。或逸而善駭。法求於和。或乾而易仆。由德稱者。鮮焉。曩予知善馬之難遭也。不求於肆。而於其鄉。一旦果得之。陰山之阿。螻略其形。蕭蕭其鳴。長顧遠視。順而能力。顧其軀非鶩然而偉也。雖儒士得以乘之。始予被皁衣於朝。朝之人多四三其牡。以迭馭。予無兼馬。一作水轍之淋漓。淖途之汪洋。結爲确犖。融爲坳堂。前有債軻。後有濡裳。我策垂空。我鑣方揚。振鬣軒昂。矯如飛翔。翹翹其雄也。非力而何。烈火之具舉。鉤膺之疊舞。一蹊千趾。駢比齟齬。彥者斯擠。悍者斯怒。我鞍如山。我轡如組。引毛容與。宛若孤處。靡靡其柔也。非慧而何。前日子之獲。譴於闕下。背商顏。趣昭邱。日中而踰舍。修門之南。非騎所宜。夷則沮洳。高則噉蠟。虎咆空林。蠶鬪荒廋。風雨孤征。簡書之威。俾予弗顛。我馬焉依。屑屑其勞也。非德而何。予至武陵。居沅水之傍。或踰月未賞。誇焉。以故莫得伸其所長。踟躕顧望兮。頓其鎖韉。飲齧日削兮。精耗神傷。寒櫪騷騷兮。瘁毛蒼涼。路聞躩牒兮。逸氣騰驤。翔雲深兮。邊草遠。意欲往兮。聲不揚。隤然似自。一作不得其所而死。故其嗟也兼常。初玄宗羈大宛。而盡有名馬。命典牧以時起居。泊西幸蜀。往往民間得其種而蕃焉。故良毛色者。率非中土類也。稽是毛物。豈祖於宛歟。漢之

歌曰。龍爲友。武陵有水曰龍泉。遂歸骨於是川。且弔之曰。生於磧礧。善馳走。萬里南來。困邱阜。青菰寒菽。非適口。病聞北風。猶舉首。金臺已平。骨空朽。投之龍淵。從爾友。

口兵戒 并序

余讀蒙莊書曰。兵莫慘於志。一作智莫邪爲下。缺然知志士之傷夫生也。它日讀遠祖中壘校尉書曰。口者兵也。蠱然知言之爲兵。又慘乎志。因博考前載。極其兩端。夫志兵之薄人。激烈抗憤。不過無從容於世耳。口兵之起。其刑渥焉。繇是知我祖之言爲急。作戒以書於盤孟。五刃之傷。藥之可平。一言成痾。智不能明。人或罹兵。道塗奔救。投方效技。恩恐其後。人或罹譖。比肩狐疑。借有解紛。毀輒隨之。故曰。舌端之孽。慘於楚鐵。夷竈誠謀。執戈以驅。掩人誠智。折筭以詈。賢者誨子。信其有旨。發言之難。伸舌一作往古猶爾。辯爲詐媒。默爲德基。玉櫝不啓。孰能瑕疵。鱗麋深居。孰謂可嗤。戒哉。一無此二字我口一作誠之啓。爾一作惟心之門。無爲我兵。當爲我藩。以慎爲鍵。以忍爲關。可以多食。勿以多言。

猶子蔚適越一作趙戒

猶子蔚晨跪於席端曰。臣幼承叔父訓。始句萌。至於扶疎。前日不自意。有司以名污賢。能書。又不自意。被丞相府召爲從事。重兢累媿。懼貽叔父羞。今當行。乞辭以爲戒。余曰。若知彝器乎。始乎斲輪。因入規矩。列中廉外。枵然而有容者。理賦質堅。然後加密石焉。風戾日晡。不剖一作副不聲。五交反然後青黃之。鳥獸之飾。乎瑤金。貴在清廟。其用也。羃以養潔。其藏也。積以養光。苟措非其所。一有毫髮之傷。齷然與破甑爲伍矣。

汝之始成人。猶器之作朴。是宜力學爲礪斲。新賢爲青黃。陸僚友爲瑤金。忠所奉爲清廟。盡敬以爲羈。慎微以爲積。去怠以護傷。在勤而行之耳。設有人思披重霄而挹顯氣。病無階而升。有力者揭層梯而倚泰山。然而一舉足而一高。非獨揭梯者所能也。凡天位未嘗曠。故世多貴人。唯天爵并者乃可偉耳。夫偉人之一顧踰乎華章。而一非亦慘乎黥刑。行矣慎諸。吾見垂天之雲。在爾肩腋間矣。昔我友柳儀曹嘗謂吾文儻而膏味無窮而炙愈出也。遲汝到丞相府。居一二日。袖吾文入謁以取質焉。丞相我友也。汝事所從如事諸父。借有不如意。推起敬之心以奉焉。無忽。

觀博

客有以博戲自任者。速余觀焉。初主人執握槩之器。寘於廡下曰。主進者要約之。既揖讓卽次。有博齒二。異乎古之齒。其制用骨。觚稜四均。鏤以朱墨。耦而合數。取應期月。視其轉止。依以爭道。是制也。道行之久矣。莫詳所祖。以其用必投擲。故以博投詔之。是日客抵骨於局。且祝之曰。其來如趨。其去如脫。事先趨。起命中無蹉跌。無從彼呼。無戾我恆。分曹逾迫。自朝至於日中。稷稷。戾也。而率率一無與所祝異焉。客視骨如梁。有情焉。如或馮焉。悉詈之不泄。又從而齟齬蹂躪之。莫顧其十日之哈讓也。乃曰。非子術之不工。是朽幣者不予畀也。請刷恥於弈碁。主人云。從命。命燭以續之。驚神默計。巧竭智匱。主進者書勝負之數於牘。視其所喪。又倍前籍焉。觀者曰。以夫人之褊心。亦將詬碁而抵枰矣。旣乃恬而不恤。赧然有失鵠求身之色。人咸異之。子劉子曰。先人者制人。博投是已。從人者制於人。枯碁是已。二者豈有數存於其間哉。但處之

勢異耳。是知當軸者易生嫌，而退身者易爲譽。易生之嫌，不足貶也。易爲之譽，不足多也。在辨其所處而已。

觀市

由命士以上，不入於市。周禮有焉。乃今觀之，蓋有因也。元和二年，沅南不雨，自季春至於六月，毛澤將盡。郡守有志於民，誠信而嚮，遂徧山川方社，又不雨，遂遷市於城門之遠。余得自麗譙而俯焉，肇下令之日，布市籍者咸至，夾軌道而分次焉。其左右前後，班間錯跣，如在闈之制。其列題區榜，揭價名物，參外夷之貨，馬牛有絳，私屬有閑，在中笥者，織文及素焉。在几閣者，彫彤及質焉。在筐筥者，白黑巨細焉。業於饜者，列饜饀，陳餅餌，而苾然。業於酒者，舉酒旗，滌杯盃，而澤然。鼓刀之人，設膏俎，解豕羊，而赫然。華實之毛，畋漁之生，交蜚走，錯水陸，羣狀夥名，入隧而分，韞藏而待價者，負挈而求沽者，乘射其時者，奇贏以遊者，坐賈顛顛行賈遑遑，利心中驚，貪目不瞬，於是質劑之曹，較估之倫，合彼此而騰躍之。冒一作良苦一作於之巧言，數量衡於檢手，鈔忽之差，鼓舌僨僂，詆欺相高，詭態橫出，鼓囂譁，盆烟埃，奮羶腥，疊巾屨，嚙而合之，異致同歸，雞鳴而爭赴，日中而駢闐，萬足一心，恐人我先，交易而退，陽光西徂，幅員不移，徑術如初，中無求隙，地俱唯守，犬鳥烏樂得腐餘，是日倚衡而閱之，感其盈虛之相尋也，速故著於篇云。

論書

或問乙字，曰：書足以記姓名而已。工與拙，何損益於數哉？答曰：此誠有之。蓋舉下之說爾，非蹈中一作之

說亦猶言居室曰避燥溼而已。言衣裳曰適寒燠而已。言飲食曰充腹而已。言車馬曰代勞而已。言祿位曰代耕而已。今夫考居室必以閨門豐屋爲美。筓衣裳必以文章適澤爲甲。評飲食必以精良海陸爲貴。第車馬必以華輶絕足爲高。干祿位必以重侯累封爲意。是數者皆不行舉下之說。奚獨於書也行之邪。禮曰：士依於德游於藝。德者何？曰：至曰敏。曰：孝之謂。藝者何？禮樂射御書數之謂。是則藝居三德之後。而士必游之也。書居數之上。而六藝之一也。語曰：飽食終日無所用心。難矣哉。不有博奕者乎？爲之猶賢乎已。是則博奕不得列於藝。差愈於飽食無所用心耳。吾觀今之人。適有面詆之曰：子書居下品矣。其人必迫爾而笑。或瞽然不屑。詆之曰：子握槳奕碁居下品矣。其人必赧然而媿。或艷然而色。是故敢以六藝斥人。不敢以六博斥人。嗟乎！衆尙之移人也。問者曰：然則彼魏晉宋齊間。亦嘗尙斯藝矣。至有君臣爭名。父子不讓。何哉？答曰：吾始欲求中道耳。子甯以尙之之弊規我歟。且夫信者美德也。秦繆尙之而賢臣莫贖。黃老者至道也。竇后尙之而儒臣見刑。道德且不可尙。矧由道德以下者哉。所謂中道而言書者何？處之文學之下。六博之上。材鈞而善者得以加譽。遇一作過鈞而善者得以議能。所加在乎譽。非實也不黷於賞。所議在乎過。非實也不紊於刑。夫如是。庶乎六書之學不墮墜而已乎。

劉氏集略說

子劉子曰：五達之井。百汲而盈。科未必涼而甘。所處之勢然也。人之詞待扣而揚。猶井之利汲耳。始余爲童兒。居江湖間。喜與屬詞者游。謬以爲可教。視長者所行止。必操觚從之。及冠舉秀才。一幸而中說。有司

懼不厭於衆。然一作以口譽之。長安中多循空言以爲誠。果有名字。益與曹輩敗漁於書林。宵語途話。琴酒調謔。一出於文章。俄被召爲記室參軍。會出師淮上。恆磨墨於楯鼻上。或寢止羣書中。居一二歲。由旬服升諸朝。凡三進班。而所掌猶外府或官課。或爲人所倩。昌言奏記移讓。告諭奠神志葬。咸猥并焉。及謫於沅湘間。爲江山風物之所蕩。往往指事成歌詩。或讀書有所感。輒立評議。窮愁著書。古儒者之大同。非高冠長劍之比耳。前年蒙恩澤授以郡符。居海壖。多雨慝作。適晴。喜躬曬書於庭。得已書四十通。適爾自哂曰。道不加益。焉用是空文爲。真可供醬蒙藥楮耳。它日子壻博陵崔生關言曰。某也。曩游京師。偉人多問丈人新書幾何。且欲取去。而某應曰。無有。輒媿起於顏間。今當復西。期有以弭媿者。繇是刪取四之一。爲集略以貽此郎。非敢行乎遠也。

名子說

魏司空王昶名子。制誼咸得立身之要。前史是之。然則書紳銘器。孰若發言必稱之乎。今余名爾長子曰咸允。字信臣。次曰同廩。字敬臣。欲爾於人無賢愚。於事無小大。咸推以信。同施以敬。俾物從而衆說。其庶幾乎。夫忠孝之於人。如食與衣。不可斯須離也。豈俟余勸哉。仁義道德。非訓所及。可勉而企者。故存乎名。夫朋友字之。非我職也。顧名旨所在。遂從而釋之。孝始於親。終於事君。偕曰臣。知終也。

奏記丞相府論學事

十一月七日。使持節都督夔州諸軍事。夔州刺史劉某。謹奏記相公閣下。凡今能言者。皆謂天下少士。而

不知養材之道。鬱堙而不揚。非天不生材也。亦猶不耕者而歎廩庾之無餘。非地不產百穀也。伏以貞觀中。增築學舍千二百區。生徒三千餘人。時外夷上疏請遣子弟入附於三黜者五國。雖菁菁者莪。育材之道不足比也。今之膠庠。不聞絃歌。而室廡圯廢。生徒衰少。非學官不能振學也。病無貲財以給其用。鰥生今有一見。使大學立富。幸遇相公在位。可以索言之。禮云。凡學官春釋尊于其先師。斯禮止于辟雍。類宮非及天下也。今四海郡縣。咸以春秋上丁。有事孔子廟。其禮不應於古。且非孔子意也。炎漢初定。羣臣皆起屠販爲公卿。故孝惠高后之間。置原廟於郡國。逮孝元時。韋玄成以碩儒爲丞相。遂建議罷之。夫以子孫尙不敢違禮以饗其祖。況後學師先聖之道。而首違之乎。祭義曰。祭不欲數。語云。祭神如神在。與其煩於舊饗。孰若行其教道。今夫子之教日頽靡。而以非禮之祀媚之。斯儒者所宜憤悱也。竊觀歷代。無有是事。皇家武德二年。詔於國學立周公孔子廟。四時致祭。貞觀十二年。又詔修宣尼廟於兗州。至二十年。許敬宗等奏。乃遣天下諸州縣。置三獻官。其他如方社。敬宗非通儒。不能稽典禮。開元中。玄宗饗學。與儒臣議。繇是發德音。其罷郡縣釋奠牲牢。唯酒脯以薦。後數年定令。時王孫林甫爲宰相。不涉學。委御史中丞王敬從刊之。敬從非文儒。遂以明衣牲牢。編在學令。是首失於敬宗。而終失於林甫。習以爲常。罕有敢非之者。謹按本州四縣。一歲釋奠物之直。緡錢十六萬。有奇。舉天下之郡縣。當千七百。不啻羈縻者不在數中。凡歲中所出於經費。過四十萬。適資三獻官飾衣裳。飽餽一作妻子而已。於尙學之道。無有補焉。前日詔書。許列郡守臣。得以上言便事。今謹條奏。某乞下禮官博士。詳議典制。罷天下縣邑牲牢衣幣。如有生徒。

春秋依開元敕旨用酒醴暇修牖棟粟示敬其事而州府許如故儀然後籍其資半附益所隸州使增學校其半率歸國庠猶不下萬計築學室其器用豐簞食增掌固以備使令凡儒官各加稍食其紙筆鉛黃視所出州率令折入學徒既備明經日課繕書若干紙進士命讎校亦如之則貞觀之風粲然不殊其它郡國皆立程督投紱懷璽械樸菁莪良可詠矣伏惟相公發迹咸自諸生其尊素王之道儀形四方宜在今日是以小生敢沿故事以奏記於左右姑舉其大較至於證據纖悉條奏具之章下之日乞留神省察不勝大願惶恐拜手稽首

澤宮詩

全唐文有引字篇中詩不載

澤宮送士歲貢也晉昌唐如晦以信誼爲良弓文學爲菟矢規爵祿猶衆禽密殼持滿遡風蜚微者數矣有措楛之妙而無雙鶴之獲韞弓收視歸究其術繇是跡愈屈而名愈聞君子益多之彼不由其術一幸而中者雖懸貺在廷君子未嘗多也歲殫矣告予以西余爲賦澤宮一章庶見子之弓弗再張也已秩秩澤宮有的維鶴祁祁庶士於以干祿彼鶴斯微若止若翔千里之差起於毫芒我矢旣直我弓旣良依於高墉因我不臧高墉伊何維器與時視之以心誰謂鶴微

魏生兵要述

余爲書殿學士四年所與居皆鴻生彥士一旦詔下懷吳郡章而東門下生成惜是行且曰吳中富士必有知書宜爲太守所禮者及下車閱客籍森然三千有鉅鹿魏生持所著書來謁曰不佞始讀書爲文章

凡二十年。在貢士中。孤鳴甚哀。卒無善聽者。退而收視易慮。伏北窗下。考前言。成兵要十編。度諸侯未遑。是事將笈而西。求一言以生羽翼。予取書觀之。始自黃帝伏蚩尤。至於隋氏平江南語。春秋戰國事最備。磅礴下上數千年間。其攬撫評議無遺策。用是以干握兵符貴人。宜有虛已而樂聞者。子盍行乎。吾知元侯上舍。不獨善雞鳴。彈長鉞。三五九九之伎。顯之而已。

救沈志

貞元季年夏大水。熊五武溪鬪決於沅。突舊防。毀民家。躋高望之。溟滓葩華。山腹爲坻。林端如沙。一作湍道駛悍。不風而怒。崩嶷前邁。浸淫旁掩。柔者靡之。固者脫之。規者旋環之。短者顛倒之。輕而泛浮者。碾礪之。重而高大者。前卻之。生者力音。殪者弛形。蔽流而東。若木枿然。有僧愀焉。誓於路曰。浮鬪之慈悲。救生最大。能援彼於溺。我當爲魁。里中兒願從。四三輩皆狎川勇游者。相與乘堅舟。挾善器。維以修紵。杙於崇邱。水當洄洑。人易寘力。凝矚執用。候可而極。大凡室處之類。穴居之彙。在牧之羣。在象之馴。上羅黔首。下逮毛物。投乎洪瀾。致諸生地者。數十百焉。適有擊獸如鴟夷而前。攬持流枿。首用不陷。隅目傍睨。其姿弭然。甚如六擾之附人者。其徒將取焉。僧趣音促訶之曰。第無濟。是爲目之。可里所而不能有所持矣。舟中之人曰。吾聞浮鬪之教。貴空。空生普。普生慈。不求報施之謂空。不擇善惡之謂普。不逆困窮之謂慈。曩也。生必救。而今也。窮見廢。無乃計善惡而忘普與慈乎。僧曰。甚矣。問之迷且妄也。我之教惡乎。無善惡哉。六塵者在身之不善也。佛以賊視之。未伽聲聞者。在彼之未寤也。佛以邪目之。惡乎無善惡邪。我曩也。所援而

出死地者衆矣。形乾氣還。各復本狀。蹄者躑躅然。羽者翹蕭然。而言者譏諷然。隨其所之。吾不尸其施也。不德吾則已。焉能害爲。彼形之乾。鬚鬚之姿也。彼氣之還。暴悖之用也。心足反噬。而齒甘最靈。是必肉我屬矣。庸能躑躅譏諷之比歟。夫虎之不可使知恩。猶人之不可使爲虎也。非吾自遺患焉爾。且將貽患於衆多。我罪大矣。子劉子曰。余聞善人在患。不救不祥。惡人在位。不去亦不祥。僧之言遠矣。故志之。

